

四庫全書

史部

欽定四庫全書

浙江通志卷一百九十二

人物十

隱逸上

堯舜在上下有巢許以故巖棲谷處之士含貞而
葆素者史不絕書浙自嚴瀨龍邱久傳高躅嗣爾
風徽所播往往立懦廉頑足徵樂澗碩人重闢風
教其與放廢山林徜徉詩酒者固不可同日而語

也志隱逸

杭州府

漢

張儼

咸淳臨安志後漢末餘杭人有賢德不樂榮利嘗開園種瓢以所資錢造橋俗稱葫蘆橋

陸瑋

兩浙名賢錄字文該錢塘人漢季納祿歸隱於靈鷲山蓮花峰下

三國吳

諸葛起

舊餘杭縣志少爲學潛心著述仕吳爲步兵校尉後隱居山房宗族蕃盛其山今號爲本

山

南北朝

褚伯玉

南史本傳字元璩吳郡錢塘人少有隱操寡慾年十八父為之婚婦入前門伯玉從後門

出遂住剡居瀑布山性耐寒暑時人比之王仲都
在山三十餘年隔絕人物王僧達為吳郡禮致之
伯玉不得已得郡信宿交數言而退寧朔將軍邱
珍孫與僧達書曰聞褚先生出居貴館此子減景
雲棲不事王侯抗高木食有年載矣自非折節好
賢何以致之昔文舉棲冶城安道入昌門於茲而
三馬却粒之士餐霞之人乃可斃致不宜久羈君
當思遂其高步成其羽化望其還策之日斃紆清
塵亦願助為譬說僧達答曰褚先生從白雲遊舊
矣古之逸人或留慮兒女或使華陰成市而此子
索然惟朋松石介於孤峰絕嶺者積數十載近故
要其來此冀慰日夜止談討芝桂借訪荔蘿若已

窺煙液臨滄洲矣知君欲見之輒當申譬宋孝建二年散騎常侍樂詢行風俗表薦伯玉加徵聘本州議曹從事不就齊高帝即位手詔吳會二郡以禮迎遣又辭疾上不欲違其志勅於剡白石山立太平館居之建元元年卒年八十六伯玉常居一樓上乃葬樓所孔珪從其受道法於館側立碑

杜京產

南齊書本傳字景齊吳郡錢塘人閉意榮宦頗涉文義專修黃老會稽孔顗清剛有峻節

一見而為歎交郡召主簿州辟從事稱疾去除奉朝請不就建武初徵員外散騎侍郎京產曰莊生持釣豈為白璧所回辭疾不就會稽孔道徽守志業不仕京產與之友善

顧黯

南齊書顧歡傳歡同郡顧黯字長儒有隱操與歡俱不就徵

呂道惠

舊浙江通志餘杭人隱居講學生徒徙者數百人范述曾從道惠授五經

褚雅

義傳詳

盛紹遠

兩浙名賢錄餘杭人梁封闔內侯天監二年辭榮嘉遁開門受徒執贄稱弟子者數百人

既沒門人立碑以旌德業

唐

孫路

舊浙江通志富陽人少有詩名後隱居不仕鄭谷以詩贈之曰平生詩譽更誰過歸老東吳命

若何知己凋零垂白髮故園寥落近滄波酒醒蘚砌花陰轉病起漁舟鷺迹多深入富春人不見聞

門空掩半庭柯

宋

林逋

宋史本傳字君復錢塘人少孤力學不為章句性恬淡好古弗趨榮利家貧衣食不足晏如也

初放遊江淮間久之歸杭結廬西湖之孤山二十年足不及城市真宗賜粟帛詔長吏歲時勞問薛映李及在杭州每造其廬清談終日而去嘗自為墓於廬側臨終為詩有茂陵他日求遺稿猶喜曾無封禪書之句既卒仁宗賜謚和靖先生賻粟帛通善行書喜為詩其詞澄決峭特多奇句既就稿隨輒棄之曰吾方晦迹林竅且不欲以詩名一時况後世乎然好事者往往竊記之今所傳尚三百餘篇逋不娶無子教兄子宥登進士甲科

李頎

春渚記聞字粹老舉進士當得官棄去烏巾敝裘為道人遍歷湖湘間晚樂吳中山水之勝遂

隱於臨安大滌洞天往來苕溪之上過名人勝士必與周旋素善丹青間作小詩東坡倅錢塘日粹

老以幅卷作春山橫軸且書一詩於後不通姓名
付燕者令俟坡之出投之坡展視詩畫已奇之及
問燕者曰我負薪出市有一道人與我百錢令我
呈此實不知何人也坡益驚異之即散問西湖名
僧輩知是粹老久之偶會於湖山僧居相得甚喜
坡因和其詩云詩句對君難出手雲泉勸我早抽
身其風致
可見矣

王衷

萬應杭州府志字天誘政和中郡守監司
表薦賜號悟靜處士視朝請大夫俸給

徐夷

萬應杭州府志徽宗朝賜號冲晦先生
故廬在城中吳山又嘗居萬松嶺下

陸維之

咸淳臨安志字永仲一名凝之字子才除杭
人少以計偕入汴羣從邀與雜坐命相者某

道人視之道人指維之曰秀才叩以科第則曰且
歸山道士揖別贈以粒丹曰緩急用之陸下第南

歸舟循汴風激浪怒舟不能勝以丹投之風浪始
息汴上有呼其姓名者則道人也維之遂有超世
之志隱於大滌洞天石室人因以石室先生稱
之逍遙林石以詩酒自樂光堯嘗召見稱疾不赴
後光堯幸大滌孝宗亦侍進主觀者問山中詩人
以維之對進其詩光堯讀數首太息曰布衣入翰
林可也孝宗曰山林隱士必不要人知要他出去
却是苦他遂止未幾卒有石室小隱集三十卷行
世於

徐立之

萬曆杭州府志舊名炳學老子法隱於杭西
湖之迴峰人呼迴峰先生通判都官員外郎

蘇為嘗謂之曰何不仕乎曰若時與命會可以佐
天子福元元不然悔吝生矣曷若追冥鴻霧豹與
孤雲俱為敬
其言為著傳

元

金應桂

萬歷錢塘縣志字一之能詞章宋季為縣令入元隱居風篁嶺書學歐陽詢畫學李龍眠

築蓀壁山房左弦右壺中設圖史古器客至撫玩清談鱣鱣不休每肩輿入城幅巾縈衣望之若神

仙云

陳渭叟

萬歷錢塘縣志讀書學道不混俗不忤物賦詩有天然趣隱居葛溪上歲一歸名人勝士

爭邀致之惟恐其去也所著有紫陽篇

鮑完澤

萬歷錢塘縣志字信卿資識粹敏慎重寡言涉獵經史過目輒不忘累以學行薦於朝部

使者爭辟用之以母老辭不就

吾衍

宋滬吾衍傳字子行杭人意氣簡傲不為公侯屈色常自比於郭忠恕居生花坊一小樓客至

僅輒止之通姓名使登乃登廡訪使徐琰一日來見衍從樓上呼曰此樓何敢當貴人登耶願明日謁謝琰聞笑而去衍亦卒不往生徒從衍遊者常數十百人衍坐童子地上使冠者分番下授之或對賓談嘍羣童皆肅容莫敢動衍左目眇又跛右足有晉宋間風致畜兩鐵如意日持弄之或倚樓吹洞簫數曲起然如忘世者

褚師秀

遂昌雜錄號雪嶽以清苦節行聞一日平章尤公單騎從一童至天慶方丈觀主王管轄

者不知為平章尤乃自言觀主大驚尤曰我欲一見褚高士耳觀主謂其人孤僻士宰相何取而欲見之尤意彌堅觀主乃扣門師秀方讀書問為誰觀主言平章請見師秀拒之曰某自來不識時貴

人言訖欲入而尤顧已拜於地意欲高士延坐其室師秀即鍵戶偕行廊廡間至雲堂前語尤曰三年前有閩州王高士留此某則非其人也因長揖竟出尤瞻顧嗟咨曰是真一世之高士

崔彥輝

成化杭州府志錢塘人號雲林生與王蒙皆吳興趙氏甥善篆隸詞賦畫亦超詣隱居賣

樂監
橋市

俞和

成化杭州府志字子平杭人晚年自稱紫芝老人隱居不仕能詩善書繪早年得見趙松雪運

筆之法臨晉唐諸帖甚夥行草學松雪逼真好事者得其書每用松雪款識倉卒莫能辨

王達

貧士傳字志道錢塘人足一畝家極貧無以朝夕因賣藥不繼入市卜博究子史百家客至輒

談今古不休人知其辨博每以疑難質之夫口輒應

孫蕉田 包太白

成化杭州府志皆錢塘人隱於西溪不受徵聘以詩文相娛樂終其

身人目之為

西溪二隱

劉英

列朝詩集傳字邦彥錢塘人少從學夏大理李爵臨川聶大年教授於杭奇之與為忘年友景

泰中郡邑交辟以母老固辭築室於甘泉榜其室曰竹東更號賓山年七十二卒程克勤志其墓以為孝友似黃山谷高蹈似魏清逸曠達似楊鐵崖分省人物考英操行高潔當天順成化間與劉泰輩結社賦詩名動一時有賓山集蕉葉藻竹東小葉湖山詠錄

陳雍

成化杭州府志字孟熙仁和人與同邑鄭璧夏誠稱莫逆交俱不事榮利日為湖山游咏父士

寧與璧母皆年高在堂每造必升堂謁拜父母沒五為服總三人交義風動鄉人璧之子孫誠之子

皆登進士惟雍樂志幽隱縣大夫兩以明經舉皆不就世居鹽橋七寶深巷中復厭囂塵徙城北獨山之陽年四十二卒無子

洪鑑

錢塘縣志補字器之號時軒錢塘人裏惠鍾之弟少孤貧攻苦力學不輟寒暑詩文楷法俱超

絕大學士商文毅聞其名辟置幕下薦授中書舍人欲大用之而鑑性恬淡不樂仕進歸隱西溪以圖史消歲月裏惠敬歷中外屢遣人招鑑俱不赴及官尚書欲薦於朝又愿止之且貽書曰兄為良臣弟為隱士亦各行其志而已著有時軒自怡集二十卷

王澍

兩浙名賢錄字時雨錢塘人性高亢不諧於俗為詩多獨創語寄興山水自號山人貧鮮儋石

儲一介不苟取與而口未嘗言貧終身無所干客遊京師與胡端敏同還至滄州遇賊劉六等數萬

人圓其域數日不解山人為州將畫方略賊遁胡
端敏大奇之欲薦之朝山人力辭卒以布褐終其身

唐俞

海寧縣志字聖言邑人博雅工詩翰多深湛之
思阮中丞鶚督浙學時檄曰海寧唐俞不求聞

達人也操履澹泊與明月清風高山大川相遊
行因大書逸士表其閭所著有審山樵漫草

邵穆生

仁和縣志字汝宣工部員外郎經邦子為諸
生年未三十遽棄舉子業隱靈鷲山中築閣

祀許由及唐宋名賢為樓三楹中祀其父右自處
藏書又三楹足不入城市遇文人墨客鮮不傾倒
獨不喜與貴介遊布政使吳用先欲見之謀於其
鄉達黃汝亨汝亨請屏騶從以儒生服往汝亨先
行謂穆生曰有桐城學者欲見公讀所著書穆生
許之吳繼入遂設飯極歡而罷明日汝亨札至曰

昨來乃方伯吳公夙慕先生者吳公亦遠吏齋手
書贊幣求所著書穆生亦不靳也又善畫有求畫
者輒不與曰
吾豈畫師耶

李元昭

兩浙名賢錄字用晦杭州右衛世襲千戶少
尚節俠年二十六始折節讀書避居靈隱寺

之西澗築一室如斗引澗水環於席下蒼松翠竹
週迴籬壁間人跡既絕惟有泉鳴鳥啼與書聲相
和答興至為韻語直闕漢魏之室自號岫嵎山人
四方名流韻士過武林訪山人煮茗焚香終日清
言不倦或一言及塵俗輒起擊石磬數聲以代洗
耳當道聞其名或鳴騶相遇即鍵戶不納晚結西
湖詩社操觚之士以不與為恥山人年四十一而
隱十年而雲遊遊八年而還故山復高卧二十餘
年而後歿人
以為蟬蛻云

汪渢

魏禧汪渢傳錢塘人字魏美中崇禎己卯鄉試未聘里富人欲妻以女渢不許錢太守以女妻

之既成禮渢從容謂錢曰吾寒儒得連姻貴室所望知禮義孝事姑嫜和妯娌足矣侈替珥綺繡之飾毋庸也錢於是去服飾屏侍婢以疏布親操作內姻欲強渢試禮部出千金視渢妻曰能勸夫子駕則畀汝對曰吾夫子不可勸吾亦不受此金也當事或割俸金為壽不得却坎而瘞之里貴人請墓銘拒弗許嘗出游天台居石梁左右反河渚徙孤山之匡廬黃山白岳所至與異人高士遊年四

十八
卒

嘉興府

晉

韓績

嘉興府圖記字興齊其先廣陵人避亂居嘉興仕吳為大鴻臚績少好文學以潛退為操布衣

疏食不交當世東王並宗敬之司徒王導辟為掾不就會稽內史孔愉疏薦詔安車束帛徵之不起

宋

許斐

海鹽縣圖經嘉熙間隱居秦溪於水南種梅數十樹構屋讀書因自號梅屋室中於三楹下分

四榻中垂一簾對懸白香山蘇東坡二像事之所著有獻醜集燕談行世

常詵

海鹽文獻志字宜卿同之孫累辟不就所著有天間雜著櫟齋筆記雪溪稿門人稱雪溪

先生

常崇

海鹽文獻志字召仲曾祖同從宋南渡僑寓邑之天寧寺子孫遂家海鹽崇值宋季閉闕不仕

苦心篤學善屬文繞庭植竹
數十竿以屬操自號曰竹窻

元

謝國光

嘉興縣志字觀夫宋咸淳間對策言時事劉
切主司畏賈似道不使登第補太學生入元

不仕侍御史程鉅夫奉詔搜賢或薦國光輒杜
門稱疾及卒遺命題其墓曰安節謝國光之墓

吳鎮

兩浙名賢錄字仲圭嘉興人性高介隱居不仕
工辭翰善畫山水竹石每題詩其上當時稱為

三絕有勢力者求之多不得惟贈貧
士使取直焉以愛梅自稱梅花道人

程克柔

弘治嘉興府志字德剛讀書涉大義傍通法
曹既而歎曰晝夜行墨累累立人座側豈吾

志哉遂勅去及元季朝廷遣將路成駐兵皂林兵
肆民間克柔親詣軍門為成備陳利害成稱善引

為上賓欲奏官之以老辭退居梧
桐鄉宅有柳百餘株因號柳莊

鄭忠

舊浙江通志字原凱嘉興人閉門讀書無間寒暑從衛富益講易一夕夢吞北斗自是詩名大

著志在恬淡雅好泉石終元世高蹈不仕

朱炎

嘉興府圖記崇德人七歲能作韻語十歲能屬文及長博極羣書名重儒林隱居不仕

陳堯道

嘉興府圖記嘉興人通五經不仕與楊維禎輩倡和所著有竹林集

明

陳子才

兩浙名賢錄海鹽人五經六藝諸子百家無不通解尤善丹青點染自娛不輕為人下筆

元末隱居不仕洪武初下詔以人才徵弗就有司為之勸駕卒不起年四十歲旦日忽命童子折梅

花一枝侍於側自繪其像
形神宛然閣筆端坐而逝

徐晟

海鹽文獻志字公允號蓀庭天資穎敏經史子集內外典靡不周覽強記以博洽稱王大叅衡

按海上命取韻府考事得之楮間注云出漢雋詢知晟命延入禮敬之問漢書數事詳對無失稱曰

徐漢書幼業舉子以貧故橐書漱上授徒有司嘗舉游庠辭不就

朱朴

海鹽文獻志字元素澹嗜欲體臞而脩音聲琅琅時一吟咏令鄙吝坐消力穡具餐郡大夫徐

白泉懇致之以疾辭且曰吾氓也焉可與尊官抗禮吾無他能以益若治吾休矣有西村集許杞山

序而刻之

陳鑑

海鹽文獻志字用明性高抗鄙舉業弗習有古俠士風或諷曰出事公卿禮也勸為省臬掾父

兄喜為入鉅鑑曰大丈夫不力學何甘伏人下棄弗就閉門讀書人罕見其面者數年學遂成至老口不輟吟篇章浩穰金鏗波激卓然名家

袁仁

兩浙名賢錄字良賁嘉善人父祥祖顯皆有經濟學仁於天文地理厯律書數兵法水利之屬

靡不諳習謂醫雖賤業可以藏身濟人遂寓意於醫崐山魏校疾召仁使者三至弗往謝曰君以心疾召當含咀仁義炮治禮樂以暢君之精神不然雖十至無益也校疾愈訪仁與語三日大驚遂定交焉顯嘗作春秋傳三十卷祥作春秋或問八卷以發其旨仁復作鍼胡編以聞之

郁從周

萬厯秀水縣志字泰初自幼神骨清爽嘗闔門靜坐時時吟咏亦善鼓琴登嘉靖己酉鄉

薦再上春官不第即棄去歎衲出遊或數年一歸省其母遂去莫知所之嘗至南嶽遇異人有所指

授後遇張紫陽授大丹訣要乃
還武林賣藥市中人無識者

殷仲春

嘉興縣志字東臯隱居城南茆屋短牆不蔽風雨弦歌賣藥喜購古帖殘書補葺考校生

平落落寡合遇顯者輒引避子志
伊字古耕胼胝力田好讀晉書

戴晉

續獻徵錄字康侯居未中之牆頭村幼孤多疾從叔灝與同里項元海交好攜晉就醫因遍閱

項氏家藏名蹟自茲工畫後寓居精嚴寺僧房時與方外秋潭高士殷方叔高元雅輩交間游名山仁金焦北固之間者歲餘嘗圖其景以贈人喜鶴洲山水樹石時來休止遂於湖濱構小屋以居名蝶華居沒葬其側一生不娶不茹素亦不嗜葷不蓄一童飲食止一小鐺自炊不備火具其孤高絕

俗如
此

盛德潛

紫桃軒又綴秀水人自號杞菊老人癖嗜古著存古錄劄記彛鼎奇物書繪真蹟如周公

謹雲烟過眼錄之例畫學倪雲林不肯為人作間點筆輒自碎之

屠壙

嘉興府志字聞伯善事母隱居講學補修之入輒以周宗黨故常至空匱

湖州府

周

披裘翁

高士傳不知何許人亦不詳其名寒暑所服惟一裘因呼披裘翁或嘗隱於天目嘗出採

薪遇延陵季子見道傍遺金季子命翁取之翁投鏹於地瞋目拂手而言曰何子居之高視之下儀

貌之莊語言之野也吾五月披裘而負薪豈取金者哉季子謝之問其姓不對而去

三國吳

姚仲翁

兩浙名賢錄吳興人天性儉素種瓜灌園以供衣食鄉人稱為長者或有餽遺一無所受

不得已而受即惠貧乏未嘗以一介自汙瓶粟屢空晏如也

晉

計昭

弘治湖州府志字叔明武康人黃武中為車騎將軍後隱於禺山晉宣帝徵召不起

沈警

西吳里語字世明武康人專治左氏春秋謝安辟為參軍謝病歸安固留不可乃笑曰沈參軍

有獨善之志不亦高乎王恭鎮京口復引為參軍手書招致詞甚殷勤不得已而應之尋復謝去

南北朝

沈道虔

南史本傳吳興武康人少仁愛好老易居縣北石山下孫恩亂後饑荒縣令庾肅之迎出

縣南廢頭里為立宅臨溪有山水之玩時復還石山精廬與諸孤兄子共釜庾之資困不改節受琴於戴逵王敬弘深貴重之郡州府凡十二命皆不就有人竊其園菜者外還見之乃自逃隱待竊者取足去乃出人拔其屋後大荀令人止之曰惜此荀欲令成林更有住者相與乃買大荀送與之盜者慙不取道虔使置其門內而還常以拮拾自資同招者或爭樾道虔諫之不止惡以其所得與之爭者愧慙後每爭輒云勿令居士知冬月無複衣戴融聞而迎之為作衣服並與錢一萬既還分身上衣及錢悉供諸兄弟子無衣者鄉里年少相率受學道虔常無食以立學徒武康令孔欣之厚相資給受業者咸得有成宋文帝聞之遣使存問賜錢三萬米二百斛悉供孤兄子嫁娶徵員外散騎

侍郎不就年老菜食恒無經日之資而琴書為樂孜孜不倦文帝勅郡縣使隨時資給予慧鋒修父

業不就

州辟

沈麟士

南齊書本傳字雲禎吳興武康人少好學家貧織簾誦書口手不息宋元嘉末文帝令尚

書僕射何尚之抄撰五經訪舉學士縣以麟士應選少時稱疾歸鄉更不與人物通養孤兄子義著

鄉曲作元散賦以絕世太守孔山士辟不應隱居餘于吳茅山講經教授從學者數十百人征北張

永為吳興請麟士入郡麟士聞郡後堂有好山水乃往停數月永欲請為功曹使人致意麟士曰明

府德履冲素留心山谷民是以被褐負杖忘其疲病必欲飾渾沌以蛾眉冠越客於文冕走雖不敏

請附高節有蹈東海而死爾永乃止永明六年詔徵為太學博士建武三年徵著作郎永元二年徵

太子舍人並不就負薪汲水并日而食守操終老
爲學不倦遭火燒書數千卷年過八十耳目猶聰
明以火故抄寫燈下細書復成二千卷滿數十
篋時人以其爲養身靜嘿之所致也同郡沈儼之字
士恭徐州刺史曇慶子亦不仕
南史本傳鄉里號織簾先生

沈顗

梁書本傳字處默吳興武康人幼清靜有至行
慕黃叔度徐孺子之爲人從叔勃貴顯齊世每

還吳興賓客填咽顗不至其門勃就之顗送迎不
越於間勃歎息曰吾乃今知貴不如賤俄徵爲南
郡王左常侍不就永明三年徵著作郎建武三年
徵太子舍人俱不赴永元二年又徵道直郎亦不
赴顗素不治家產惟以樵採自資怡然恒不改
其樂天監四年大舉北伐起民丁吳興太守柳惔
以顗從役揚州別駕陸任以
書責之惔大慙厚禮而遣之

陸琳

茅山志東遷人九徵不起謚高蹈先生

唐

沈徵

弘治湖州府志沈法興之孫太子文學承家之子博學知古隱江口山孝弟力田累徵不起縣

令韋永慶改其所居為茂德鄉

吳馮

吳興掌故字季德菱湖人僧皎然有杼山禪居寄東溪吳處士詩馮善詩故皎然所寄專以詩

言

宋

賈收

貧士傳字耘老烏程人以詩著名喜飲酒家素貧東坡每念之嘗作古木怪石書其後以贈云

念賈處士貧甚無以慰其意為作古木怪石一紙
每遇飢時輒一開看還飽人否若吳興有好事能
為君月致米三石酒三斗終君之世者當便以
贈之不爾可令侍姬掌貯須添丁長以付之也

胡仔

西吳里語字元任烏程人父舜陟官至法曹從
叔舜申舜舉皆為郡守知名仔少無宦情自號
茗溪漁隱留心吟咏取自古詩人
所作考之傳記為叢話一百卷

元

史博

雲汀筆談字約之烏程人博極羣書尤邃
於易元世祖訪求南人遠近交辟不就

黃玠

弘治湖州府志字伯成其先慈溪人曾祖震宋
天祥榜進士玠生於嘉興之魏塘為人清苦

力學無所不通嘗樂吳興山水因卜居弁山為吳
興人號弁山小隱與趙文敏遊文敏極稱許之謂

生平第四友也錢塘學者請為西湖書院長
力辭不就請者益勤不得已居數日而罷

沈貞

弘治湖州府志字元吉長興人不樂仕雖在畝
畝手不釋卷一日縣令欲辟之先使人覘其意

貞知之避匿不出宅傍有井冬夏原泉涌流不止
溉田數百畝貞往來吟咏其上自號茶山老人有

茶山稿十二

卷行於世

邱輔仁

弘治湖州府志字友文歸安人少有至行不
樂華靡母以綵帛衣之輒羞赧不服惟事詩

書不為章句五經百氏悉研究其旨至正末張氏
偽平章潘元明聞其名使人召之輔仁移家逃匿

至洪武初始還

以農業終身

章得一

西吳里語字德茂歸安人十歲能文比長不
樂仕進元學士程雪樓薦之不起嘗積書萬

卷從學者遠近畢至有悠然先生集子橫塘亦有
稽古之學善畫畫家貧不苟取於人洪武初召拜
知府對曰臣有布政才以下官
不能也辭弗就宋濂以詩贈之

壺攷

崇禎烏程縣志字怡樂號萬菊居士隱居不出
工詩詞有燕雲集集中自稱宋謙之或曰無名

氏曰宋者不忘本也曰無名者恥成名
也龍泉稱三益之師他門人顯者百計

林靜

弘治湖州府志字子山德清人曾祖弁祖友信
父德驥世為管軍總管靜髫髻時即解綴篇什

研窮經史百氏旁及元詮釋典郡縣累
辟不就著愚齋集金華宋濂為之序

夏義甫

嘉靖湖州府志鄭南人少以孝行稱博學好
古築室天目杜門隱居者四十餘年與張羽

劉佐周倬沈貫人相為師友又善
繪事天目山房圖蓋其得意作也

明

高彥常

長興縣志失其名以字行洪武初以賢良方正舉仕湖湘未幾棄官歸獨攜洞庭橘種植

故園白鶴嶺
下翳鬱成林

余詮

安吉州志洪武十六年以耆儒徵同崇德鮑恂上海全思誠高郵張長年入見四人年皆七十

餘龐眉皓首上喜賜坐顧問者久之並命為文華殿大學士令侍東宮及太孫四人皆辭上曰卿等
高年今特免早朝其勉留為朕輔導太子即不欲
留朕亦不終強也詮等復固辭翌日乃賜敕放還

寧波府

漢

黃公

三國志注會稽典錄曰鄞大里黃公潔已暴秦之世漢高帝即作不能一致惠帝恭讓出則濟

難

謹按史記留侯世家注引陳留志云公姓崔

名廣字少通齊人隱居夏里故號黃公四明文獻

志云宋畢文簡公以綺里季夏如孟子讀樂正襄收仲之誤宋潛溪非之著論以夏黃公為的明一

統志據史贊又以為隱商山中晉書夏統傳云會稽土地風俗其人有黃公之高節今大隱山有黃

墓則為鄞人無疑

張齊芳

寶慶四明志驃騎將軍意之子隱於慈溪之驃騎山人皆贊之遂以其父之官名其山

唐

許寂

冊府元龜字閑閑祖祕名聞會稽寂少有山水之好泛覽經史尤明易象久棲四明山不干時

務昭宗聞其名徵赴闕召對於內殿會昭宗方與伶人調品華菓事訖方命坐賜湯果問易義既退謂人曰君在淫聲不在政矣尋請還山寓居江陵茹芝絕粒自適其世天祐末節度使趙凝昆李深禮遇之唐末除諫議不起漢南謂之傲君

孫郃

十國春秋明州奉化人幼負氣岸博學高才唐末為左拾遺朱全忠篡唐郃著春秋無賢人論

即脫冠裳服布衣歸隱於奉化山著書紀年悉用甲子以示不臣之義

宋

楊適

寶慶四明志字韓道慈溪人明律歷曉兵法隱居大隱山以文學行義聞於鄉里人皆不敢道

其姓名以先生目之仁宗訪天下遺逸知州事鮑軻以名聞賜粟帛嘉祐六年知州事錢公輔又表

奏適高節授將仕郎試太學助教州遣從事躬捧詔書具袍笏與從以禮起之辭不受年七十餘沒

葬大隱山縣令林叔

豹為立碑祠於學

王奕

奉化縣志字謀道質敏學博詞章卓有西漢風隱居自娛講論經史以興起斯文為己任守令

知其賢率鄉之子弟受學焉卒後祠於學參政樓鏞叙行狀中丞舒亶為墓誌銘稱元祐鄉先生子

建中字師正以八行純備舉於有司不就州縣造門強起之移疾辭

劉準

成化四明郡志先餘姚人家鄞宋末隱居教授絕仕進意以甬東負郭非隱者居卜築青山之

原依先隴而居焉學者稱南窓先生子汝舟字端父確守父訓平居無戲言情容郡之名士大夫相繼來居戶屢常滿汝舟用呂氏鄉約身率而推行之苟非其人輒謝絕之不附權勢不事請託不入

城府不語及州縣得失務
本節用有餘則以濟人

劉應時

嘉靖寧波府志字良佐慈溪人於書無所不
讀邀居林下刻意於詩寄興瀟散范至能深

賞之

陳應麟

成化四明郡志字天祺鄞人淹貫經史至於
歷數之學無不究其指歸人稱通儒一日乘

馬出有失馬者亟前認馬應麟問曰子亡馬幾何
時對曰適月矣應麟有馬數年遂與之挽轡而去
明日馬從別得乃詣應麟叩頭謝庭下至元間朝
廷以安車召賢良應麟固辭不起賜號純德先生

趙文敏嘗為逸
民詩以美馬

元

汪灝

汪瀚

嘉靖寧波府志
灝字季夷瀚字幼海兄
弟也奉化黃甘里人父懋卿與弟森卿

同學同貢並因宋革不仕杜門著書灝瀚受家學
治易春秋躬耕孝養灝從海陰陳嵩伯講學著有
詩文曰蠟臺藻先卒瀚為知州馬稱德所薦授衢
州路學錄辭不赴洪武初府文學單有成奉使采
修實錄書二貢士於宋書二
處士於元真一門盛美也

史公珽

兩浙名賢錄
字指叟鄞人學通諸經尤精易
理作文典則名重一時隱居教授者數十年

程端學薦主角東書院棄去遊西州寄興吟咏以
陶寫性情每對人論宋季臺閣故事疊疊不倦及
忠臣義士死節者必慷慨流涕廣平李堯民
七喪不舉公珽傾橐助之自號蓬廬處士

明

方全翁

舊浙江通志字希元鄞人軫之裔博學力行方國珍據有明州致書以宗人稱欲強起為

輔全翁歷叙世次由莆來不敢附籍且勸之歸明國珍不從遂與之絕號遜菴以自明其志

孫玉

嘉靖寧波府志字彥暉慈溪人洪武中其父為人所誣械發京師卒於道五年十二即莆蜀返

櫬歸葬既長家日貧授徒養母不廢甘旨力學不懈工詩善草書知府李春嘗舉賢良方正又有以明經薦者皆不就

黃思銘

萬歷象山縣志號東谷子身不勝衣而志剛儻好讀書作詩清麗纖美無山林枯槁之態

洪武初累膺人材明經之聘不起所著有東谷集方正學深稱之

金華

嘉靖寧波府志字宗實鄞人洪武間從戎燕山衛值靖難守通州有功召見時弟忠以近幸授

兵部尚書上欲推恩與華辭不就賜歸徙東湖韓
嶺居焉足不履城府日坐斗室寄情經史手點書
萬餘卷後尚書迎養於金臺官舍未決旬謂曰萬
鍾之富其如我湖山樂何遂拂袖歸永樂乙未尚
書卒復召見賜白金文綺華伏闕謝曰
臣布衣野人不敢用此上稱為迂叟

紀宗德

鄞縣志鄞人博洽經史教授里閭尤習國家
典故永樂中與修郡邑通志性不樂仕進嘗

徵至京陛對稱旨欲授以
職固辭不拜後屢辟不起

向道淳

嘉靖寧波府志字永修慈谿人幼傳家學得
慈湖寶峰之宗架插遺文多宋僕射薌林舊

籍精研博采反求於心及父樸死靖難哀衣冠葬
陽嘉山手樹松楸灑泣輒瘁遂棄科舉杜門教授
事母徐極孝與顧慤為忘年友慤被召顯榮欲與
彙征道淳笑不應後督府斷事張深知淳強上其

名稱痼疾不起

紹興府

漢

嚴光

後漢書本傳字子陵一名遵會稽餘姚人少有高名與光武同遊學及光武即位光乃變名姓

隱身不見帝思其賢乃令物色訪之後齊國上言有一男子披羊裘釣澤中帝疑其光乃備安車幣
繅遣使聘之三反而後至舍於北軍給牀褥太官
朝夕進膳司徒侯霸與光素舊遣使奉書使人因
謂光曰公聞先生至區區欲即詣造迫於典司是
以不獲願因日暮自屈語言光不答乃投札與之
口授曰君房足下位至鼎足甚善懷仁輔義天下
悅阿諛順旨要領絕霸得書封奏之帝笑曰狂奴

故態也車駕即日幸其館光卧不起帝即其所撫光腹曰咄咄子陵不可相助為理耶光又眠不應良久乃張目熟視曰昔唐堯著德巢父洗耳士故有志何至相迫乎帝曰子陵我竟不能下汝耶於是升與歎息而去復引光入論道舊故相對累日因共偃卧光以足加帝腹上明日太史奏客星犯御座甚急帝笑曰朕故人嚴子陵共卧耳除為諫議大夫不屈乃耕於富春山後人名其釣處為嚴陵瀨建武十七年復特徵不至年八十終於家帝詔下郡縣賜錢百萬穀千斛

晉

夏統

晉書本傳字仲御會稽永興人幼孤貧養親以孝聞睦於兄弟每採摠求食星行夜歸或至海

邊拘嫌蠅以資養宗族勸之仕統勃然作色遂不與相見太尉賈充欲耀以文武而薄覲其來觀因

而謝之遂命建朱旗舉幡校分羽騎為隊軍伍肅然須臾鼓吹亂作胡葭長鳴車未紛錯縱橫馳道又使妓女之徒服袿襦燭炫金翠繞其船三匝統危坐如故若無所聞充等各散曰此吳兒是木人石心也統歸會稽竟不知所終

謝敷

晉書本傳字慶緒會稽人性澄靖寡欲入太平山十餘年鎮軍郗愔召為主簿臺檄博士皆不

就初月犯少微一名處士星占者以隱士當之熊國戴逵有美才或憂之俄而敷死

孔沉

嘉泰會稽志字德度何充薦於王導辟司徒掾瑯琊王文學並不就從兄坦以乘適之辭坦曰

星平仲猶狐裘數十年卿復何辭於是受而服之是時沉與魏顓虞球虞存謝奉為四族高沈子廩位至吳興廷尉廩子琳之以草書名又為吳興太守侍中

南北朝

戴顒

宋書本傳字仲若燕郡鉅人父逵兄勔並隱遁有高名故世居剡下父善琴顒及兄並受琴於

父父沒所傳之聲不忍復奏各造新弄中書令王綏嘗攜賓客造之勔等方進豆粥綏曰聞卿善琴

試欲一聽不答綏恨而去桐廬縣多名山兄弟復共遊之因留居止勔疾患醫藥不給顒曰兄今疾

為無可營療顒當干祿以自濟乃告時求海虞令事垂行而勔卒乃止出居吳下吳人共為菴室聚

石引水植林開澗有若自然乃述莊周大旨著逍遙論注禮記中庸篇三吳將守及郡內衣冠要其

同遊野澤堪行便往不為塙介衆論以此多之高祖命為太尉行參軍琅邪王司馬屬不就宋國初

建令曰顒秉性幽遁守志不渝宜加旌引以弘止退可散所常侍在通直不起元嘉二年詔曰顒志

託邱園自求衡華恬靜之操久而不渝可園子博
士又徵太子中庶子十五年徵散騎常侍並不就
衡陽王義季鎮京口長史張邵與顯姻道迎來止
黃鵠山山北有竹林精舍林澗甚美顯憇於此義
季亟從之遊顯服其野服不改常度太祖每欲見
之嘗謂黃門侍郎張敷曰吾東巡之日當讌戴公
也山

朱百年

宋書本傳會稽山陰人少有高情親亡服闋
攜妻孔氏入會稽南山伐樵採茗為業以樵

茗置道頭輒為行人所取明旦亦復如此人稍怪
之積久方知是朱隱士所賣須者隨其所堪多少
留錢取樵茗而去或遇寒雪樵茗不售無以自資
輒自榜船送妻還孔氏天晴復迎之郡命功曹州
辟從事舉秀才並不就隱迹避人惟與同郡孔顓
友善家素貧母以冬月亡衣並無絮自此不衣綿

帛嘗寒時就顛宿衣悉袂布飲酒醉眠顛以卧具覆之百年不覺也既覺引卧具去體謂顛曰綿定奇溫因流涕悲慟顛亦為之傷感除太子舍人不就顏竣為東揚州發教餉百年穀五百斛不受時山陰又有寒人姚吟亦有高趣為衣冠所重辟文學從事不起竣餉米二百斛吟亦辭之百年卒蔡興宗為會稽守餉百年妻米百斛遣婢詣郡門奉辭固讓時人美之以比梁鴻妻

孔祐

續高士傳山陰人隱於四明山嘗見山谷中有錢數百斛視如瓦石採樵者競取入手即成沙

磔太守王僧虔與張緒書曰孔祐行動幽祇德操松柱引為主簿遂不可屈此古之遺德也子道徽少厲高行能世其家風守志不仕隱居南山終身不窺都邑豫章王歲為揚州辟西曹書佐不至道徽兄子總亦有操行遇飢寒不可得衣食縣令吳興邱仲孚薦之除竟陵王侍郎竟不就

唐

秦系

唐書本傳字公緒趙州會稽人天寶末避亂剡溪北都留守薛兼訓奏為右衛率府倉曹參軍

不就客泉州南安有九日山大松百餘章俗傳東晉時所植系結廬其上穴石為研注老子彌年不出刺史薛播數往見之歲時致羊酒而系未嘗至城門姜公輔之謫見系輒窮日不能去葉室與相近忘流落之苦公輔卒妻子在遠系為葬山下張建封聞系不可致請就加校書郎與劉長卿善以詩相贈答權德輿曰長卿自以為五言長城系用偏師攻之雖老益壯其後東度秣陵年八十餘卒南安人思之號其山為高士峰云

五代

石延翰

成化新昌縣志父渝仕吳趙錢氏為太子賓客吏部尚書兄延椿平江軍節度使封司空

獨延翰不仕隱居沃洲結廬於白雲谷以書史為樂自號雲和子人稱羽林先生後贈白雲先生為

謝銓

會稽縣志仕南唐官至銀青光祿大夫金吾大將軍李氏以國歸宋銓守義挈家遁居祁門

宋

趙宗萬

寶慶會稽續志字仲困山陰人少知名錢忠懿器之入朝欲與之俱以親老辭不行既長

博極書傳負經濟之術用進士應詔藉於春官宗萬天資蕭散於世故淡如也壯歲築室於郡之照水坊左瞰平湖前挹秦望畜一鶴號丹砂引以為侶足跡不及於高門鼓琴讀書怡然自適者三十餘年祥符中詔舉遺逸郡守康戩以宗萬薦尋被召乃曰吾老矣不足以任事因獻跛龍傳以自見

且請自託於道家者流朝廷
不奪其志即其家賜以羽服

黃惠之

成化新昌縣志字子思重厚尚氣節宣和辛
丑方臘焚劫新嵎惠之與弟能以方略誘之

潰敗其衆朝廷遣郭統制收復論功行賞惠之辭
曰破賊藉國威非集之力也遂隱不出工部尚書
度共長孫也尉瑞安時迎養月
餘而歸年八十二以潔行終

石公孺

成化新昌縣志字長孺有經術高隱不仕
相謝克家禮為國士高宗詔求道逸使者朱

異薦其長於三傳召對稱旨命之官固辭高宗曰
卿當為朕勉受一官乃授迪功郎進其所作春秋
類例命藏館閣再授
監南嶽廟不久還山

王易簡

山陰縣志字理德尚書佐之曾孫幼喪父哀
毀如成人及冠登進士第除温州瑞安主簿

不赴隱居城南讀張子東銘作疏議數百言唐忠
介震黃吏部虞見而器之折輩行與交易簡薦倫

義事伯姊甚謹
尤凋卹其族

倪森

萬歷上虞縣志字彥林當理宗朝挫廉逃名甘
老泉石寬仁好施喜怒不形於色張即之四明

名士以書法擅當代寶祐年間過訪為
書大學經文於所居門廡迄今傳焉

石余亨

萬歷紹興府志字成己新昌人登咸淳進士
仕於鄞於衢已而棄官歸沃洲自號休休翁

丙子奔走萬山中更號遜翁平生喜為詩文孫
璞欲梓遺稿弗許曰卿以適吾意爾未必名家

黃奇孫

成化新昌縣志字行素號雲谷宋季隱居沃
洲從俞默翁石九成韓明善游考訂經史傳

注之異同品評古今人
物之優劣俱有確論

吳大有

縣志字有大寶祐間入太學升上舍以詞賦有聲率諸生上書言賈似道奸狀不報遂

不復有仕進意退遊湖海與林昉仇遠白珉等六七人詩酒相娛時以比竹林七賢元初辟為國子檢閱不赴卒葬戴顯墓左先是大有之友費九成為信州司理秩滿赴京會大有上書亦與歸隱

元

楊子祥

嘉靖餘姚縣志字吉甫父克和明春秋學子祥世其家卓犖有奇氣江萬里舉為縣監稅

輒棄去教授海濱學徒甚盛兵興避地西浙主牢應龍家時留夢炎事世祖為吏部尚書聞子祥賢欲致之不顧東還過鄞收謝翱方九思於臨安九思亦姚人相與弔古尋幽酌酒賦詩徜徉湖山間復有薦此數人者乃皆去歸其鄉而子祥歸姚杜門著書垂二十年而卒

陳開先

嘉靖餘姚縣志字宇覺民號魯山翁力學該博舉進士氣高不能修小禮曲貌遇公卿稍不

如意輒謝去樞使李應山鎮兩淮辟為機宜文字甚任之沿邊將帥偵意致饋間先一無所受歸隱

三十年安貧守志鄉黨尊異之

厲元吉

嘉靖餘姚縣志字無咎號半村宋末舉進士尉烏程歸隱從山元至元間訪求前宋故臣

欲強以官遜迹湖海至白首始歸

潘音

於越新編新昌人甫十歲而宋亡見長老談歷山事即潛然涕下及長讀史齊傳擊節憤歎日

杜門讀書多所自得後訪弟元甫於義烏因往從草廬吳澄學泰定間澄以薦召欲行音止之不從遂築室南洲山中名其軒曰待清隱居元詩選傳字聲甫絕意進取擬野蔬自給躬耕十餘畝非其

力不食或勸之著述曰六經語孟先儒所言備矣何以注脚為讀書有得往往筆之壁牖間至正三年詔徵天下遺逸庶訪使檄贊之行固辭卒年八十有六

張燦

於趙新編噪人欲立不凡自以家世宋臣絕意仕進作休休吟以見志自號草疇居士

葉仲凱

萬厯紹興府志餘姚人博涉經史善屬文咸淳甲戌禮部正奏名為當國者所忌罷歸終

身不仕或勸之曰君未食宋祿今仕元何不可而甘貧賤仲凱對曰吾聞周德雖興夷齊不厭薇蕨漢道方盛黃綺無間山林人各有志奈何違之勸者乃止

楊恒

續高士傳字本初諸暨人性醇篤與人語如出肺腑恥為覆藏元末州郡辟不就娶趙間請為

州間師亦不赴浦陽鄭義門延致之幡然行坐臯比以講道為己任己退居白鹿山躬耕暇則吟誦

人莫能測也高邨樂鳳來為州牧造門詣辟不起
遣問右子弟即恒家問學州常有民生法當大辟
恒哀之倡白其誣民以烏
捷謝頓顙流涕終不受

王冕

續高士傳字元肅諸暨人少好學家貧依沙門
居夜潛出坐佛膝上執筆映火讀之琅琅達旦

安陽韓性引為弟子性卒門人事冕如性冕父時
已卒迎母入城就養他日母思還里冕買白牛駕
母車被古冠服隨車後小兒遮道訕笑冕亦笑著
作郎李孝光薦之不就久之北遊燕祕書卿台哈布
哈薦以館職冕即日南還攜妻子隱九里山種豆
三畝粟倍之薤韭各百本芋一區梅花千樹構茆
屋於中傲周禮著書一卷坐卧自隨不使人觀更
深則撥火朗誦之明高帝取婺州物色冕欲授以
參軍一
夕卒

申屠澂

諸暨縣志字仲敬元時人父性受業黃潛之門澂與兄溶得其淵源謹言端行俱為鄉里

所敬憚而澂尤寡合工古文詞精篆籀小楷辟本路教授辭疾不行晚節益堅

明

許汝霖

萬曆紹興府志字時用嵎人元至正丙寅進士累官國史編修己而退居張士誠據淮浙

羅致士大夫霖遜走求之弗得歸隱於嵎洪武初徵至京未幾乞歸宋景濂以文贈之

董荆

成化新昌縣志字宗楚旭之弟博學好古長於詩文尤善畫洪武十七年舉博學宏詞上親問

治道稱旨授以縣丞辭不就

呂九成

新昌縣志字宗學與兄不用九思並稱三房兩兄個儻有才名而九成誦說溫公晦菴之

書言動由禮不與時移易其後兩兄以徵辟仕九成獨甘隱約不就舉終身茹淡被䟽弦歌自適同宗子弟數百十人咸敬事之稍未循節命至堂下戒責之皆悚仄奉教惟謹嘗道拾鈔數千貫立俟其人還之一少年被酒侵九成從者欲毆之九成止勿與校後浙江叅政胡纘宗行部至新昌問邑之文獻乃為立逸民碑推祀鄉賢

王璵

嵎縣志字公玉淹貫經史操行端懿善詩文工篆隸李公平薦之授慶元路儒學提舉不就明

興以名聞召至金陵復授前職以母老辭是時應聘而起公玉與許時用單陽元三人皆居邑東陽元受令職而公玉時用堅志遺榮徜徉邱壑

劉履

萬曆上虞縣志字坦之忠公五世孫操履端重號草澤閒民洪武十六年詔求天下博學之士

浙江布政使強起之至京師見上於奉天殿賜宴親試將授以官以老辭給寶楮若干貫為東歸費

未行而疾作卒於會同館歸葬象田山

劉績

列朝詩集傳字孟熙山陰人渙之子貢友初之甥也教授鄉里不干仕進家貧轉徙無常地所

至暑賣文榜於門有所得輒市酒樂賓客緣手而盡嘗有客至呼名久不出怪之其妻方拾破紙以代薪薪一笑而已家有西江草堂人稱為西江先生

羅頎

於越新編山陰人性淳樸力敦古道能讀祖父書著之篇章爛然成一家言太守戴琥崇禮隱

逸於頎尤注意焉羅氏三世隱梅山祖絃著蘭坡集絃長子周著梅隱稿次子新著介軒集頎所著易尚札記詩畫二百餘卷稱梅山叢書

浙江通志卷一百九十二

欽定四庫全書

浙江通志卷一百九十三

人物十

隱逸下

台州府

漢

高察

天台縣志隱居佛隴之北白沙之西有陂陀小嶺至今呼為察嶺

晉

任旭

晉書本傳字次龍臨海章安人幼孤弱勤於學及長立操清修不滌流俗郡將將秀嘉其名請

為功曹秀居官貪穢旭正色苦諫秀不納旭謝去久之秀坐事被收旭狼狽營送秀慨然歎曰任功

曹真人也吾違其讜言以至於此尋察孝廉除郎中州郡仍舉為郡中正固辭歸家永康初太守警

馥薦旭清貞潔素學識通博詔下州郡以禮發遣旭辭疾不行元帝鎮江東聞其名召為參軍手書

與旭欲使必到旭固辭以疾後帝即位復召之及為左丞相辟為祭酒並不就明帝即位又徵拜給

事中旭攝疾為經年不到

褚世標

臨海縣志義熙中隱士入山不出屢辟皆辭

唐

張濟

嘉靖浙江通志天台隱士也喻鳧贈以詩有道高天子問名重四方招之句王貞白集亦有憶

台州張處士詩

張令聞

全唐詩傳唐興人隱居不仕號天國山人有詩與杜光庭云試問朝中為宰相何如林下

作神仙一壺美酒一爐藥飽聽松風白晝眠

五代

于履

台州府志黃巖人與寧海鄭睿俱以文名睿仕吳越為都官員外郎履不仕隱居葉茶寮山自

號藥林嘗聞山得嵇夫云

宋

呂逢時

仙居縣志字原道幼警悟博覽羣書嘗受知於陳邑令襄入太學名噪日甚鄭獬友之駙

馬都尉錢景臻師之欲奏以官固辭隱於白巖山羅提刑適以孝廉舉之亦不就

林訪

仙居縣志字達本元祐中將上禮部以親喪廬墓不果遂築草堂於東山隱焉大觀中詔求八

行郡縣以訪應不憚復去之

趙占龜

兩浙名賢錄字十朋黃巖人志尚超卓與石尚書公弼李叅政光為內外兄弟二公貴無

一字相通家有軒面植雙桂人稱為桂隱士宣和寇亂動以火攻獨於是軒相戒無犯

杜文甫

赤城新志臨海人咸淳進士歷瑞安軍節推德祐初除國子博士入元翰林學士趙興熏

薦於朝侍御史程文海奉旨宣召皆以疾辭終不起自號南峰山民

友鹿翁

天啓寧海縣志不知姓名或以為先祖父仕宋為侍從顯官宋末隱姓名屏居東北者山

下不妄交游日與麋鹿相狎故自號友鹿人亦稱之為友鹿翁方遜志為立傳

元

呂徽之

輟耕錄家仙居萬山中耕漁自給一日搗楮幣詣富家易穀種值大雪聞閣中分韻作雪

詩一人得勝字苦吟弗就徽之不覺失笑詢之乃曰我意舉滕王蛺蝶事耳眾邀之入座以藤滕二字請足之復拈疊字韻隨筆即書書訖徑出問其姓氏不啻遣人尾其後識其所居雪晴往訪之惟草屋一間忽來桶中有人乃其妻也問徽之何在曰方捕魚溪上至彼果見之隔溪謂曰諸公先生舍我得魚當換酒飲諸公也少頃攜魚與酒至盡歡而散歸宿逆旅主人語以故主人喜曰是固某

平日所願見者翼旦
躡其蹤則已遷居矣

吳孝光

寧海縣志字弘濟操履端介鄉舉兩試第一
時方國珍潛據遂隱居教授國珍欲羅致幕

下逃
不赴

戴道顯

仙居縣志字均用深沉有卓識方國珍
欲聘為謀主不就將劫之遂亡匿山中

蔣大德

臨海縣志名不傳大德其字也方氏據有浙
東三郡起大德於其廬大德厚遇使者令善

為己辭且曰否者吾惟有死而已既而私謂其友
曰此輩欲汙我我平時尚不欲仕況仕於此輩乎
鄉嘗早民欲流散四方大德止之曰吾尚有粟可
以相周粟盡而去未晚也民賴以全明年又旱復
發所餘弟子告已用將不給大德
曰衆皆死而已獨生尚何心哉

明

葉允

天啓寧海縣志字良仲方國珍據浙東允深自晦匿間行金陵謁太祖於戎馬間獻武事一綱

三目策上奇其言屏人命坐賜飲食欲留用之允力辭賜金帛遣還其後徵辟歲至皆不就嘗植梅

四種於軒前自號四梅先生

張提

仙居縣志字廷器七歲讀書五行俱下長遂以文雄應省試經七里灘登子陵釣臺慨然有高

尚之志輒返棹益肆意於詩與顧黃門伊京兆唱和稱安州十騷而提執牛耳

金華府

南北朝

樓慧明

南史閩康之傳東陽樓慧明字智遠立性貞固有道術居金華山舊多毒害自惠明居之

無復辛螫之苦藏名匿迹人莫之知宋明帝召不至齊高帝徵又不至文惠太子在東宮苦延方至仍又辭歸俄自金華輕棹西下及就路回之豐安旬日之間唐寓之入城塗地唯豐安獨全時人以為有先覺齊武帝敕為立館

唐

張志和

唐書本傳字子同婺州金華人始名龜齡母夢楓生腹上而產志和十六擢明經以策干

肅宗特見賞重命待詔翰林授左金吾衛錄事參軍因賜名後坐事貶南浦尉會赦還以親喪不復仕居江湖自稱烟波釣徒兄鶴齡恐其遁世不還為築室越州東郭茨以生草橡棟不施斤斧豹席

梭屬每垂釣不設餌志不在魚也縣令使浚渠執
畚無忤色常欲以大布製裘嫂為躬績織成衣之
雖暑不解觀察使陳少游往見為終日留未其居
曰玄真坊以門隘為買地大其閭號回軒巷先是
門阻流水無梁少游為構之人號大夫橋帝賜奴
婢各一志和配為夫婦號漁童熱青陸羽嘗問孰
為往來者對曰太虛為室明月為燭與四海諸公
共處未嘗少別也何有往來顏真卿為湖州刺史
志和來謁真卿以舟蔽漏請吏之志和曰願為浮
家泛宅往來蒼雪間辨捷類如此善圖山水酒酣
或擊鼓吹笛賦筆輒成嘗撰漁歌憲宗圖真求其
歌不能致李德裕稱志和隱而有名顯而無事不
窮不達嚴
光之比云

五代

宋榮

十國春秋婺州義烏人隱居本州覆釜山下通尚書春秋廣順中忠懿王累徵不就學者私謚

曰文通
先生

騎牛者

逸民傳在婺州山中古貌巾褐手執鞭光燦日色扣角而歌曰靜居青嶂裏高嘯紫烟中

塵世連仙界瓊田前路通時有僧入山見之揖之不應馳步趨之不及望赤松而去

宋

俞澹

貧士傳字清老金華人貧而無室栖山以居人呼之曰半山道人王介甫嘉其潔尚乃強為釋

牛山澹曰無錢得祠部王為買之嫌名紫琳已戒期祝髮愆而不至王誚詰之澹曰吾思僧不易為生龜脫筒亦難堪忍祠部已付酒家償負耳

陳鵬

兩浙名賢錄字孟容義烏人志趣高邁不喜自
街靖康初結茆於雞鳴山之陽采薪拾蔬以供

母母亦歡然忘其憂自
號靜翁有詩稿五卷

黃璣

金華先民傳字敦政義烏人負高世之志絕意
仕祿建炎初從其舅宗澤至汴將授以官即辭

歸贈以白金計所用而反其餘澤復奏補
迪功郎卒不受終老於家自號葆真子

張志行

金華先民傳字公澤東陽人力學砥行鄉閭
推仰以祿不逮親遂不事科舉州郡屢辟不

應紹興三年浙東宣諭使朱异表聞
賜號冲素處士卒呂祖謙銘其墓

朱元翰

萬曆義烏縣志卓犖不羈博通經史紹興中
嘗獻賦行在言切時政後隱遁終身號四明

居士

孫惟信

兩浙名賢錄娶人工詩喜談詭嘉定初嘗於大雪中登廬阜絕頂盡得其景物之詳作記

游卷棄官不仕隱居武林湖山間自號花翁病沒安撫使趙與憲葬之湖上

姚獻可

萬歷金華府志字君俞義烏人隱居郭西門風度孤騫不同於物至飢不粒食蒸松菜茹

子啖之無醢鹽其貧不堪迄無妄求葉尚書適布衣時嘗訪之獻可曳破鞋出迎歡如舊識既疾革度不可起以書造適曰我能守義不辱子宜為我銘臨終戒其弟曰棺前止須布幘一幅置瓦爐於案知我者當自來哭其不知者雖哭吾不對也

王象之

東陽縣志志行高潔隱居不仕嘗著輿地紀勝今之輿地諸書皆本之

杜濬之

金華先民傳字若川蘭溪人伯高孫去偽子明春秋領鄉貢宋易世後感激自倬矯行晦

迹寄食西峰
僧寺以終

李直方

金華先民傳字德方東陽人少以世業治尚書舉進士不第退治河洛之學德祐初會求

直言抗疏闕下不報歸益潛心六籍旁搜百氏聲實兼著宋末隱居教授其受業弟子陳樵胡滅陳士允皆以文學知名晚歲家益貧與其弟子耦耕南山之麓人皆以龐德公擬之

趙若恢

東陽縣志字文叔生而秀異甫成童能默誦五經為文數千言立就嘗應詔言事悉時政

所急弱冠登咸淳乙丑進士宋亡避地新昌山遇族子孟頫與居相得甚時元主方求索趙氏之賢者子昂轉入天台依楊氏為元所獲若恢以間得脫程鉅夫之使江南也有司強起之稱疾且曰堯舜在上下有巢由今孟頫益貫已為微箕願容巢為巢由也鉅夫感其義釋之於是僻處城東北隅

杜門不出深衣大帶摩娑古柏間年八十餘
龐眉皓首四方徵文獻者詣之多謝却焉

徐鈞

正德蘭谿縣志字秉國別號見心宋汀州使君
時升之子以父仕為濠州定遠尉宋亡不仕家

故多書日以史籍文章自娛與仁山先生有雅因
歎致之以教其子且朝夕惕厲明修己治人之道

陳取青

東陽縣志字煥之父少從石一鰲受朱氏之學
寶祐間抗章詆賈似道誤國之罪不報歸隱

於家自號閒蟻翁宋既亡元伯顏見
其章為之嘆息欲官之力辭不就

于石

萬曆金華府志字介翁蘭溪人因所居鄉自號
紫巖晚徙城中更號兩溪貌古氣剛喜誼諧早

慕杜氏五高之為人後從王定菴業詞賦接聞諸
老緒論其學多所通解自負甚高宋改物後隱居
不出一意於詩出入諸家豪宕激發氣骨蒼勁望
而知為山林曠士一時言詩者皆莫能及仁山金

先生嘗
序其集

吳思齊

萬厯金華府志字子善永康人其先居處州之麗水祖深有奇才陳亮以子妻之遂家永

康父選官至朝散郎思齊少穎悟以文章家知名用父廕補官攝嘉興丞數以書干宋臣用事者言賈似道母喪不宜用卹簿又言御史俞浙以論謝堂去職宰相附貴戚塞言路如朝廷何凡所要言以直遂其志第知有是非不知有毀譽禍福也宋末隱浦陽家無儋石之儲有勸之仕者輒謝曰譬猶處子業已嫁矣雖凍餓不能更二夫也所善惟方鳳謝翱相與放遊山水間晚自號全歸子方鳳評思齊為人如徐積陳師道君子不以為過大德辛丑年六十四手編聖賢順正考終之事曰佚命錄錄成賦詩別諸友遂卒神明湛然無但化意

元

金涓

金華先民傳字德源義烏人從許謙講道於八華山稱為高第既又從黃潛學古文詞與宋濂

王禕朱廙為友其文雅健有奇氣乘興援筆頃刻千百言不自休性樂恬淡絕意仕進虞集柳貫交章薦之皆不起入明州縣屢辟輒辭曰穢尊青黃豈木所願狐豚之好游戲汙瀆且吾髮已種種焉能騁馳簪組間哉於是厭所居迫市徙去縣南蜀山之下青村以居朋舊扣門輒焚香淪茗促席對榻抵掌劇談客去復閉門不妄出學者稱青村先生

陳樵

宋濂鹿皮子墓誌東陽人字君采人因其衣鹿皮故又號為鹿皮子其先居睦之富春宋之中

葉徙東陽幼學於家庭繼受易書詩春秋大義於李直方文辭於狀物寫情尤精自出機軸不蹈襲

古今遺轍性至孝父患風嵐之疾扶之以行後為風痰所侵氣弱不能吐截竹為笛時吸而出之母郭夫人沒見其遺衣輒奉之鳴鳴而泣生平未嘗言利家素饒遇歲儉輒竭粟賑里閭嘗發所藏錫為器工人持歸乃白金也
悉易之或以告一笑而已

李序

元詩選傳字仲倫東陽人年十七追和李賀樂府嘗遊京師宋褰危素見其所著四書新說引

為莫逆交許有壬言於中書滕江浙行省俾為學校官未用而滕歿嘆曰命也夫遂歸隱東白山中與友人陳樵日相吟咏
以自樂著有細絢集

鄭謚

兩浙名賢錄字彥淵金華人晦迹衡門不求聲譽攻陰陽歷數之書嘗注郭璞葬書以為獨詣

後聞其友葉儀范祖幹之論方知正學刻苦研窮晝夜不輟有心學國說蘇伯衡胡平仲為之序

明

滕浩

金華縣志字至剛家赤松之梁山洪武中為府學訓導未幾退隱玉壺山永樂中詩傳西蜀或

達於王所王重之屬聘為校文官辭歸

金信

分省人物考字中孚蘭谿人穎悟工詩從楊維禎遊往來吳越間部使者以茂才舉不應歸隱

金華之優游洞學者稱漫吟先生有春草軒集傳於世子聲字伯鏞與袁仲仁陳大有輩皆以能詩聞於時號十才子

鄭柏

分省人物考字叔瑞浦江人隱居著書或以其名達之蜀王王顧其兄惜曰叔瑞可謂清逸之

士人以清逸處士稱之

方太古

舊浙江通志字元素金華人少警敏好吟咏其父造從章慙受經不屑治章句遂棄去專

力為詩古文居女埠溪上自號寒溪壯歲出游三吳與姑蘇楊循吉都穆文徵明相倡和而詩益進既游八閩林堃一見莫逆為作錦囊十咏以贈之一時名輩如林泉山林見素皆爭相引重出閩歷探匡廬九華桂林陵之勝僑居吳中久之從者雲集晚歸隱金華解石山中鄉大夫士莫不造廬禮訪焉

王如心

義烏縣志字元近號搢平幼穎異年十六七即棄舉子業讀書小樓研究經史及象緯歷

律方輿器數之學考於親友於兄弟喪偶不娶與人交一言之諾終身不移著起從集若干卷萬歷乙未巡按御史李楠疏其學行於朝曰銳志清修不干利祿龍德而隱者也縣令張維樞申請建坊

於觀音橋側題
曰清修高隱

吳孺子

續高士傳字少君蘭谿人兒時父不課經史獨授杜詩一編長好離騷老莊爾雅遇俗夫

則云吾不識字口誦詩使人代書之家居蘭谿東郭負郭有田一頃盡硤瘠鑿溝引山泉入厨日閉門藉虎皮危坐或問之曰吾尋味好客話言耳性愛潔不畏寒遇泉水清冷雖秋冬輒解衣以浴嘗遊雁蕩天台石梁絕糧啖蘆葍根四十餘日後居僧寺自炊一銅竈飯不足則鋪糜日買兩錢菜分餘業為菴羹語人曰免吾低眉向人勝飽於梁肉耳有一大瓢摩妙如玉所至持攜他日過荆溪遇盜破之抱瓢泣數日夜乃去晚自稱破瓢道人隆慶末卒於梁溪

胡榮

萬歷湯溪縣志一名道榮字希華宋經略使頴之後早嗜學蒐獵百家旁通九藝與江善之游

繼從金華江公若得其根原居家孝友名動鄉閭
都憲邵祀亞卿吳紳交薦不起年七十卒門人私
諡為文
莊先生

衢州府

漢

龍邱長

後漢書任延傳延為會稽都尉吳有龍邱長
者隱居太末新莽時四輔三公連辟不到掾

吏白請召之延曰龍邱先生躬德履義有原憲伯
夷之節都尉灑掃其門猶懼辱焉召之不可遣功
曹奉謁修書記致醫藥吏使相望於道積歲長乃
來輦詣延府門願得備錄延遂署議曹祭酒尋病
卒

南北朝

徐伯珍

南齊書本傳字文楚東陽太末人少孤貧叔父璠之還袪蒙山立精舍講授伯珍往從學

積十年究尋經史遊學者多依之太守琅琊王曇生吳郡張淹並加禮辟伯珍應召便退宅南九里有高山班固謂之九巖山伯珍移居之門前生梓樹一竿便合抱館東石壁夜忽有赤光洞照俄爾而滅白雀一雙栖其戶牖論者以為隱德之感永明二年刺史豫章王辟議曹叅軍不就家甚貧窶兄弟四人皆白首相對時人呼為四皓

宋

程汝士

萬厯龍游縣志字虞卿親歿廬墓終喪嘗入太學素歸不復仕進銳意經史學者景從仁

宗朝士大夫薦為郡教授講論不倦樞密陳旭賢良王介與臺府交章薦其孝廉特賜粟帛英宗搜訪遺賢長史強起卒於山陽還家易樞如生學者稱廣平先生

周順之

弘治衢州府志江山人明易學有節行與趙

麓間進趨極艱苦既歸拊問曰先生何以教汝且怒且答拊曰汝處安佚寧知稼穡汝享膏粱寧知

蒸藿教汝多矣宜深識之

慎伯筠

弘治衢州府志字東美西安人豪於詩應貢京師見棘闈嚴甚曰此非所以待天下士也

拂衣歸嘉祐間韓琦薦之與林和靖俱至伯筠留京師一日遇壘峽道人傾蓋如舊談論累日人莫能解自是不飲亦不作詩

毛赫

天啓江山縣志博學多聞不營利祿宋仁宗嘉其恬退卒贈奉郎

成默

衢州府志字利賓西安人隱居業漁建炎初以漁舟濟高宗於金山高宗欲官之辭不就乃賜

宅一區田五十頃於禮賢門外

楊復義

衢州府志字子宜號西清西安人宋末與父偕隱師事金仁山歸於西清授徒講學當事

屢徵辟不就常衣葛行吟草澤間家素饒裕立義學義康義塚復立義田以飯僧時號為西清隱士

張裕

開化縣志字好問性孤介樂道忘貧貢於鄉徐霖師事之尤為趙庸齋汝騰所重達人顯官以

幣餽者悉不受有司強其出對曰得優游昇平之世寄傲山水之間足矣烏用仕為乃即橫溪先隴側構室鑿池曰徜徉其中澹然自得鄉里有婚姻喪葬者必從問禮有紛爭者必就辨曲直家雖不

裕而每矧人急弗靳
也永嘉黃淮銘其墓

蔣芸

兩浙名賢錄開化人咸淳鄉舉上疏論賈似道
奸不報遂不就南宮試而歸元累徵不起人稱

芹澗
先生

元

徐庭琬

衢州府志字宇清常山人大興玄孫性穎敏
八歲能文從伯父夢麟學博綜羣書至元間

領鄉薦拔舉博學宏詞除國子學正不受辭歸自
號金川隱者設義田義倉賑恤鄉里郡守王俊劉

克昌高其學行延為明正書院山長大闡經旨從
游者皆成名儒至元末廉使復辟堅不起潛匿石

崆山
谷卒

明

趙檜

兩浙名賢錄字廷堅江山人負氣節博學能文母周嘗驚欽造就學於數百里之外既歸母流

涕語檜曰吾始可見若父於地下矣隱居養母終身不仕

童珮

萬應龍游縣志字子鳴家貧從其父載書鬻吳越間挾策問字輒通曉意義後買一舫遊四方

帆檣下皆貯書讀之窮日夜不休又善考證書畫金石彝鼎之屬嘗遊岷山執經於歸有光有光為贈序道其依依問學之意久之學益富詩歌日益有名與王世貞王穉登遊太保朱忠禧與其兄恭請王遣人邀至京師愛而欲留之一夕邀去嘗與韓邦憲定交逆旅邦憲守衡親過其家山塢中序布衣昆弟之好珮請為祠祀龍邱先生邑有龍邱祠自此始邦憲卒於官徒步送其喪卒年五十四

子鳴藏書萬卷手皆自勸警爲於交誼有所期雖
千里不爽薄田數十畝割田以創村塾龍有溺女
之俗捐羨粟以給舉
女者有文集行世

嚴州府

唐

許法稜

嚴陵志字道冲建德人
唐永泰中東帛聘不就

羅萬象

嚴陵志分水人隱於紫邏山浙西觀察使李
德裕使人召之萬象更逃入深山築白雲亭

居之終
身不出

翁洮

嘉靖浙江通志字子平壽昌人舉進士授主客
員外郎退居不仕僖宗以建州刺史李頻薦遣

使徵之令睦州守臣催促上道不起作枯木詩以
答詔僖宗復遣使以曲江魚賜之宋理宗朝追諡
為善慶公

五代

方昊

嘉靖浙江通志字太初淳安人生於唐末唐亡
遜隱巖谷中吳越錢氏招之不往聚徒講學於

上貴精舍以終其身鄉人稱為靜樂先生
宋咸淳八年就上貴寺建祠祀之

宋

邵炳

淳安縣志晃之子登天聖五年進士第為富陽
簿秩滿歸築樓名白雲而隱焉范文正公守睦

招之不就內相葉道卿郡倅張文定屈炳主錢塘
學亦辭後張在諫垣薦之召赴闕因上時政機要

第三篇除祕書省校書郎知義烏縣不赴復還舊隱時稱白雲先生

方逢嘉

淳安縣志字君會領漕薦任無錫尉調轉船兩倉司門事凡知者累以文學政事薦之辭

不就歸隱於所居馬巖山下號巖隱先生

齊龍高

嚴陵志字彥登淳安人為上舍生咸淳七年釋褐第一授迪功郎婺州教授尋隱居不仕

創讀書之室名曰相莊聚徒授學以終老焉

章元禮

余乾亨元真山人傳端平咸淳間三薦監闈一舉進士宋亡乃匿迹蹈光肥遁林壑自書

其門曰舊時科目中儒戶今日山林下逸民居家謹養生送死之禮既老自誌其墓諱其名曰元真

山人

余夢魁

遂安縣志字梧叔世居松林舉鄉薦宋運革築室璉塢山中大書松林二字刻於石元初

有司累薦不起年七十餘臨訣屬子姪曰吾宋人墓碑書宋林處士足矣

余德明

遂安縣志字克新弱冠登文天祥榜進士官翰林編修校理預修國史宋末里居不仕賦

歸隱詩以見志焉

元

嚴侶

桐廬縣志字君友子陵三十五世孫從學賈漢英賈之學實源於朱子貴官至鈞臺必訪侶勸

之仕則曰吾鼻祖高風遠韻與富山桐水為流時某不敏願為賢子孫足矣嘗遊錢塘有勳於中丞歸遽遺喪擗踊氣絕者數四治喪一用朱子禮廬墓三年不脫衰絰有白燕巢於墓木至順辛未卒

門人私諡曰
高節先生

何景福

淳安縣志字介夫號鐵牛子學博行修累辟不赴優游泉石所著有鐵牛翁詩集

李康

桐廬縣志字寧之年十三母病弗痊割股和饘以進病隨愈里稱孝子從永康胡長孺遊以古

學自鳴至正三年郡守馮九皋遣使幣迎力辭之九年張奉使素聞其賢又起之復辭十六年宰臣達實勒至邑即致幣遣令詣諸議事康不得已而往欲官之以母老懇辭歸及卒高陽許璫青田劉基臨其喪作詩以誄之

徐舫

績高士傳字方舟桐廬人約躬有道喜怒不形幼尚俠好馳馬試劍已而幡然悔去為進士業

已而又悔曰人生貴適意奈何跼蹐章句中於是游江漢淮浙間以詩歌自娛江浙叅政蘇天爵來

薦之舫笑曰吾詩人耳其可以章絃乎竟逃去築
室江皋每天雪放舟釣江中終日不返自號滄江
散人高帝初劉基應聘舟沂桐江而西舫冠黃冠
衣白鹿皮褰立江濱目送之曰卿寧不愧桐江水
耶基與同聘者皆與舫善衡舫以隱自高數欲屈
致之舫愈自匿人莫知其跡而終宋通徐舫墓誌
宛陵羅氏率五百指來避兵衣且食之病者予藥
死無所歸則擇地藏之事平具巨舟載之還家

溫州府

晉

張薦

永嘉郡記隱居頗志家有苦竹數十頃於竹中
為屋常居其中王右軍聞而造之薦逃避竹中

不與
相見

唐

劉沖

萬厯溫州府志永嘉人隱居大羅山人稱其所居曰蕙讓里秀才洋君子山

五代

蔣湛

永嘉縣志有高操刺史季廣琛建牙持牒詣其家徵之不就至今名其鄉曰建牙

嚴永

十國春秋溫州永嘉人初仕南唐厯顯官一旦避地歸嚴永冠於平陽青華山穴中為人傭作

以自給吳越王物色得之永不得已於穴間取衣冠以行已復避去不知所之土人名其處曰嚴公

嚴

宋

周侃

萬歷温州府志永嘉人行誼表著真宗召之不起郡人名其巷曰招賢坊終護國山中

朱聿

萬歷温州府志字合甫永嘉人隱於江北台山穴巖以居作合山游數千言號歛子有隱清

堂集郡守周延

爲數問既不受

方曄

舊浙江通志字聖時永嘉人父端以文行為歐陽公器重曄生未期而孤力學爲行敝衣糲食

處之裕如自號迂愚翁大觀初詔舉行誼郡以曄應選回解不就

林幹

樂清縣志字國材崇寧初士皆以舍法論秀登名幹獨不事舉業閉門著書居木榴山因號木

榴子著淵通四十八篇覃思十三篇邑令鮑輝遺幹書謂讀覃思知古大聖人治心養性盡於此矣

淵通一書理義精微非晚學能窺涯涘一日見幹草衣木質進退踈野始知爲遁世士益尊事之

徐必友

隆慶平陽縣志字仁卿鐸孫儒雅博洽政和間屢薦不起隱柏洋山下作善養亭誦咏終

身自號

逸叟

周彥通

萬厯溫州府志永嘉人豫子當恩補避匿弗出父歿後家徒四壁怡然自得居常蔬食一

介無所苟取結廬謝池不與俗接

林崧孫

瑞安縣志字喬年介夫孫幼孤力學通詩易尚書為文清潔而善通實事與永嘉陳鵬飛

友善及鵬飛謫死遂絕意仕進自號允光居士曰與沈東美韓汝翼修其祖故事保墳墓厚風俗紹

興之季後進多尚官達至高尚有舊典型惟推喬年

薛高

萬厯溫州府志字寧仲永嘉人任連城簿棄官而隱讀書作文至老不休家有讀書樓郡守樓

鑄為之記陳謙贈詩有萬卷編抄高似屋一門師友重如山之句從孫嵎登寶祐第調長沙簿一旦

掛冠去以詩酒自娛終其身

朱黼

平陽縣志字文昭學於陳止齋不事舉業嘗著紀年備遺始堯舜迄五代若呂武王莽朱溫皆

削其紀年以從正統葉水心序之且云此書一出義理所會寶藏充斥人始知其能傳陳氏學也躬耕於南蕩山抱其學以終

朱元昇

平陽縣志字日華黼從子嘉定武進士棄官不仕入南蕩山嘗曰賈三才之道者莫大於

易精研三十年沛然有得乃著三易備遺十卷行於世嘗於其鄉築堰備水鄉人德之名朱公堰

何傅

貧士傳字商霖永嘉人屬詩知名釜爨常空而意趣悠然漠不為累業通常稱其凍餓自守之

樂死之日殯具無貲其友
翁忱率素往來者葬之

元

薛魁祥

萬厯温州府志字壯行平陽人有文行登咸
淳進士授淳安尉宋革命遂棄官杜門著書

辟連江宰不就同時有顧近仁字力行才器偶遇
亦不仕學者宗之曰江南先生有詩萬餘首名小

集慚

鄭昂

平陽縣志字處抑不諧於俗隱居讀書至正癸
巳冬叛卒陳安國據城以禮訪之昂婉拒挈妻

子避西華山中事廢始歸僉憲巴
延布哈行部義其事屢薦不就

孔皖

平陽縣志字子充至正壬午鄉貢授宗文書院
山長秩滿歸隱居養親有經略使至延見上政

略五篇言天下利害使嘉納之授浙間照磨使輔周嗣德守禦元已不復仕有詩云故居燒後拾殘

編留得陶詩一兩篇彭澤豈堪猶作令義熙何忍再書年

金建

瑞安縣志字長民隱居不仕以春秋教授鄉里至正間方國珍海艘犯境獻策築城備禦達納

實哩從其言郡賴以安省府交辟徵為秘書管勾不赴優游田里自號林居子國珍據郡以禮延致終不屈

明

朱希晦

樂清縣志襟度夷曠博通羣籍元末民間所

在爭相雄長希晦兩弟與劉公寬日構兵乃往見公寬諭以理解去洪武初以賢才召至京師授朝列大夫不拜歸與趙新鮑原宏相倡和搆雁

山三老別
號雲松

何白

列朝詩集傳字無咎永嘉人幼時為郡小史龍君御為郡司理異其才為加冠集諸名士賦詩

以熊之為延譽於海內遂有威名西游酒泉南窮湘沅歸隱於梅嶼山中有汲古閣集行世

處州府

宋

吳戴

嘉靖浙江通志字叔才處州人鄉里遵其行恬於隱遁無仕進意宋康定中孫沔為郡奏以教

授州學部使者亦薦於朝詔賜帛嘉祐中朝廷訪遺逸沔自政府出帥餘杭復奏薦之詔不起上嘉其節授將作監主簿亦不就卒門人諡曰冲和先生繪像於郡學春秋祭祀焉

管師復

嘉靖浙江通志龍泉人與弟師常從安定胡瑗學俱有盛名時號二管師復長於詩隱居

不仕仁宗聞其名召至問曰卿詩所得如何師復曰滿塢白雲耕不盡一潭明月釣無痕賜爵不受放歸故里人稱之曰卧雲子著有白雲集行於世

王昌言

紹興縣志字君用官至左武大夫知武州

周頊

遂昌縣志字成珍性恬淡不樂仕進侍讀楊萬里疏其名薦於朝詔徵不起與鄉人進士華廷

年周若思講明經義隱居西郭

蔣時憲

紹興縣志舉賢良方正上治平十策時韓侂胄用事議多不合擢左司諫不拜固辭還山

寧宗嘉其節特賜奉議郎

王舜

縉雲縣志字良佐以太學生試魁
上書言事忤時相遂隱居大洋山

朱上交

枯蒼彙紀隱水人安貧樂道隱居
鄉里詔徵不起賜號養素先生

林偉

枯蒼彙紀青田人仕宋著
崇儒錄後避亂隱居不仕

程瑄

兩浙名賢錄字元爽枯蒼人棹四世孫調海門
簿宋末棄官歸為道士建太極陽明書院居之

自稱神
陽先生

元

蔣琰

青田縣志字叔圭屏居南田宋中丞繼周之孫
家貧授徒自給足跡未嘗至邑郭詩文師韓杜

孝友溢
於家庭

梅隱

舊浙江通志字聘君縉雲人徜徉山水好植梅後人改名其山曰梅山

趙雷

縉雲縣志字省之嘗從滕璘學授考亭心法著遵所開集名冠一時後隱不出

周權

括蒼景純字衡之松陽人通經史工詩至京師歐陽玄薦於館職以母老辭不受有此山集子

仲瑜承家學以辟授掾軒書院山長改紫陽書院

姚榮

龍泉縣志字君衡號雲樵陳壇器重之妻以女恩授永嘉簿不就賓興會賈似道專擅率太學

諸生伏闕極論之不報遂退伏鄉里元使宣慰來括請見榮說以仁則得衆勿放火縱兵人心自安使從之奏授慶元簿慨然曰本為桑梓出顧博官乎辭不受歸訂諸子作論益直筆續有薦者俱不起

王鑑翁

遂昌縣志字子明賢良渚之父有勸之仕者曰吾身度之審矣岩容澗姿豈堪飾之章服

或以聞於衆賢曰是能樂天者也遂號之樂天處士趙待制雍名其園曰田園任趣及卒太史宋濂撰銘誠意伯劉基篆額學士陶安弔以詩王裒以益之善士易之幽人稱之以

趙德光

括蒼葉紀字子明扁所居曰樂善聚書耽誦至忘寢食於世紛華澹如也或勸之仕不就

一日道拾白金其遺金老嫗哭於途德光歸具金舒穆嚕宜孫器之

明

留睿

舊浙江通志字若愚一字養愚括蒼人治經術攻詩文居青田山中二十年出游吳楚齊晉人

二十年歸隱於好溪有紫芝玄鶴之瑞著書九篇名曰留子

毛輝

縉雲縣志博學雄文詞總制孫炎薦署學事屢辟不起樹卉種菊策杖獨步入紫青山卜地為

窆穴曰全歸富士友以愛菊類陶稱為潛齋先生今白龍山潛齋書院其遺址也

吳叔圭

括蒼彙紀宣平人博學善屬文洪武中舉賢良方正不就隱居以終其身

金鑑

縣志字國潤明初貢仕太寧簿時棄官變姓名隱於杭之西湖

山陰

彙紀字賓暘青田人隱居好古不利詩文有奇氣著有存存生集

浙江通志卷一百九十三

欽定四庫全書

史部

浙江通志卷一百九十四

詳校官給事中臣戴璐

檢討臣德生覆勘

總校官編修臣倉聖脉

校對官中書臣李奎

謄錄舉人臣孫炯

欽定四庫全書

浙江通志卷一百九十四

寓賢

上

春秋紀寓公之文遷史著客卿之號非曰借才異地亦以仰止高賢也兩浙夙擅通都人稱樂土或稅駕而遊或授廬而處迹與名留地因人重其流風餘韻雖千百載下穆然猶可髣髴云志寓賢

杭州府

晉

郭文

晉書本傳字文舉河內軹人也少愛山水尚嘉
遯年十三每遊山林彌旬忘返父母終服畢不

娶辭家遊名山入吳興餘杭大滌山中倚木於樹
苦覆其上而居焉亦無壁障時猛獸為暴入屋害
人而文獨宿十餘年卒無害餘杭令顧颺造之攜
與俱歸颺以文山行或須皮衣贈以韋袴褶一具
文不納辭歸山中王導聞其名遣人迎之既至置
之西園園中果木成林又有鳥獸麋鹿於是朝士
咸共觀之文頽然箕踞旁若無人居導園七年未
嘗出入一旦忽求還山導不聽逃歸臨安結廬山
中

南北朝

徐儀

陳書本傳東海郟人陵第三子少聰警以周易生舉高第為祕書郎出為烏傷令禎明初遷尚

書殿中郎尋兼東宮學士

陳亡隱於錢塘之赭山

徐孝克

陳書本傳陵第三弟也少為周易生有口辨能談玄理既長徧通五經博覽史籍梁太清

初起家為太學博士性至孝侯景亂京邑大饑孝克養母餽粥不能給薙髮為沙門乞食以充給焉後東遊居錢塘之佳義里與諸僧討論釋典遂通三論每日二時旦講佛經晚講禮傳道俗受業者數百人天嘉中除剡令非其好也

唐

丁飛

咸淳臨安志字翰之濟陽人讀老莊書居錢塘龍泓洞蓄妻子事耕稼如常人夜半山靜取琴

彈弄少睡寡言與人相接禮簡情至未嘗有罷倦之色又不見有所服餌或問之曰治心修身之外復有何物

張祜

畿輔通志字承吉貝州清河人稱張公子性高曠工詩雲溪友議祜初與徐凝同赴白居易杭

州求解白試之以凝居首次祜祜不服因太息歸自此罷舉

謹按祜今多誤作祐祜有子望虔爲冬瓜堰官祜自言冬瓜合出瓠子事見太平廣記此名祜之證

宋

潘閔

兩浙名賢錄字逍遙太谷人寓居錢塘通易詩春秋尤以詩知名所交游皆一時豪俊曹彬奏

為四門助啟

徐復

宋史本傳字復之建州人初游京師舉進士不中退而學易通流行卦氣自筮知無祿遂無進

取意游學淮浙間他日聽其鄉人林洪範說詩且言詩之所以用於樂者忽若有得因以聲氣求之遂悟大樂於七音十二律清濁次序及鐘磬侈弇匏竹高下制度皆洞達范仲淹過潤州見復問曰今以衍卦占之四陸無變異乎復對西方當用兵推其日月後無少差慶厯初與布衣郭京俱召見命為大理評事固以疾辭賜號冲晦處士後居杭州十數年而卒西湖游覽志復居杭州萬松嶺與林通並稱二處士云

晁補之

宋史本傳字無咎濟州鉅野人父端友工於詩補之聰敏強記纔解事即善屬文十七歲

從父官杭州見山川風物之麗著七述以謁州通判蘇軾軾先欲有所賦讀之歎曰吾可以間筆矣

由是知名舉進士拜國子編修實錄
檢討官還家葺歸來園號歸來子

洪皓

宋史本傳字光弼鄱陽人少有奇節登政和進士為秀州司錄大水皓白郡守發廩以糶浙東

綱米過城下白守邀留之守不可皓曰願以一身
易十萬人命人感之切骨號洪佛子建炎三年擢
徽猷閣待制為大金通問使至雲中尼瑪哈迫使仕
劉豫皓曰萬里街命不得奉兩宮南歸恨力不能
磔逆豫忍事之耶尼瑪哈怒將殺之旁一酋曰忠臣
也為之請得流遞冷山二帝居五國城皓密遣人
奏書聞佑陵計北嚮泣血旦夕臨金主聞其名欲
以為翰林學士皓力辭未幾金大赦許使人還鄉
皓與張邵朱弁並遣還留北中凡十五年忠義之
名聞於天下既見秦檜語曰張和公金人所憚乃
不得用錢塘暫居而景靈宮太廟極土木之華豈
非示無中原意乎檜不懌出知饒州尋謫濠州團

練副使安置英州居九年始復朝奉郎徙袁州至南雄卒帝聞嗟惜之復徽猷閣學士謚忠宣皓久在北庭不堪其苦然為金人所敬博學強記有文集五十卷燉煌事實紹興十三年皓全節歸朝見內殿求還鄉養母帝曰卿忠不忘君雖蘇武不能過也豈可舍朕去因賜第於錢塘之葛嶺命迎養其親

楊由義

寧志備考字宜之家世開封建炎初由義父以軍前正將扈駕南渡未幾寇入杭由義奉母避地鹽官寇踵至母妹俱以節死由義抵杭其父適以督運自富陽還父子大慟為母妹成葬禮遂家於鹽官由義幼時頗從事學問久之遂與漕薦丰度俊偉詞翰典麗館於賢士大夫之門者凡二十年晦菴朱子亦其弟子也使金營帥強之拜由義曰本朝見宰相無拜禮此膝詎易屈帥怒械

繫月餘守節益堅竟完壁歸孝宗嘉
歎遷太府卿兼刑部侍郎卒於鹽官

周煇

兩浙名賢錄字昭禮淮海人紹熙間居錢塘清
波門之南嗜學工文隱身不仕當世名公卿多

折節下之而簡亢自高未嘗報謝藏書萬
卷父子自相師友撰清波雜志十二卷

宋斌

萬厯杭州府志字文叔袁州人少從黃幹李燾
登朱子之門學禁方嚴羈旅困沮年且八十矣

臨安尹趙與權延之事以父行奏乞用旌禮布衣
故事不報卒葬西湖與權歲一祭焉私諡淳固先
生

施岳

湖山勝槩字仲山吳人僑
居武林能詩精於律呂

梁棟

胡迺梁隆吉詩集序字隆吉其先相州人父安
道寓鄂州棟生於鄂弱冠登第初選寶應簿再

調錢塘仁和尉一時聲名籍甚入元居武林守道
安貧澹如也平居吟咏稿無存者門人問曰先生
何故不存稿答曰如吾
詩堪傳人將有腹稿在

元

虞集

四川通志仁壽人汲之子西湖遊覽志字伯生
少不偶寓居錢塘元詩選傳集從草廬吳澄游

大德初薦授大都路儒學教授累遷奎章閣侍書
學士修經世大典進侍講學士至治大厯間宗廟
朝廷之典冊公卿大夫之碑版咸出其手粹然成
一家言門人訂其在朝應制歸田方外諸稿釐為
五十卷曰道
園學古錄

楊載

元史本傳字仲弘其先居建之浦城後徙杭因
為杭人少孤博涉羣書為文有跌宕氣以布衣

召為國史院編修官延祐初以科目取士載首應詔登進士授承務郎遷儒林郎寧國路總管府推官初吳興趙孟頫在翰林得載所為文極推重之由是名動京師凡所撰述人多傳誦之西湖遊覽志載與虞伯生揭曼碩范德機齊名世稱虞楊范揭云

鮮于樞

西湖遊覽志漁陽郡人為江浙行省都事因居杭風流文雅善歌詩无工書名在吳興趙

文敏伯仲間遷太常簿致仕

陳柏

輟耕錄字雲嶠泗州人性豪宕祖平章積金七屋不數年散盡嘗為侍儀舍人館閣諸老莫不

折輩行與交其妻鐵太保女也恃富貴近戚偶以一言驕之遂終身不見嘗被命鑄祭器於杭無錫倪元鎮慕其名求見之張燕湖山間羅設甚至酒終為別以一帖饋米百石柏舉巨觥顧倪曰吾在

京即熟爾名云江南士清無與比其所以章
章者以米沽之也請從今日絕其氣節如此

張翥

兩浙名賢錄字仲舉晉寧人父為吏從征江南
調安仁尉又為杭州鈔庫使因家焉翥少豪放

不羈好蹴踘走馬不以家業屑意父憂之一旦改
業閉門讀書因受業於李存又從仇遠學以詩文
名一時累官翰林學士承
旨所著有蛻菴集忠義集

劉汶

劉濩

兩浙名賢錄汶字師魯鄆王六世孫占
籍錢塘以文章淑後進德行學術與劉

濩齊名濩字聲之莆田人占籍於杭
與師魯俱以文行為一時寓賢之首

繆倫

輟耕錄字叔夔東平人侍父宦游錢塘至正十
六年淮兵寇城執其父將殺之倫哀號乞免弗

聽傾家貲以贖又弗聽乃自
縛請代於是殺倫而釋其父

龍廣寒

輟耕錄江西人寓居錢塘挾預知之術游湖海間咸推為異人又行服氣導引之法常佩

小龜十數於身至晚仍解飼之事母至孝六月一日母生辰方舉觴為壽忽見北牕下梅花一枝盛開遂稱之曰孝梅贈詩者甚多至治初卒年百有八歲猶童顏綠髮云

貫雲石

兩湖塵談阿爾必雅之孫父名貫格根因以貫為氏名小雲石酸齋其號也有文武才折

節讀書為古文峭厲有法詩歌古樂府慷慨激烈士大夫樂從之游少用父蔭為萬戶府達魯噶齊乃讓與其弟後以文行薦為翰林侍講學士知制誥既又辭疾還江南詭姓名易服色賣藥錢塘市中人無有識之者七修類稿雲石臨終作辭世詩云洞花幽草結良緣被我瞞他四十年今日不留生死相海天明月一般圓洞花幽草二妾名也北山棲雲菴其藏修之所

薩都拉

兩浙名賢錄字天錫雁門人寓居武林博雅工詩文風流俊逸而性好游每風日晴美輒

肩一杖掛瓢笠腳踏雙不借走兩山間凡深巖邃壑人跡所不到者無不窮其幽勝至得意處輒席草坐徘徊終日不能去興至則發為詩歌以品題之今兩山多有遺墨而西湖十景詞尤膾炙人口後莫知所終元詩選傳天錫陟官閩憲往還吳越其過嘉興越臺懷古題爛柯山石橋諸律真能別開生面

鄒世聞

杭州府志字字聞遠登州黃縣人襲授百戶戌海寧遂為海寧人張士誠陷浙西見元官多

從賊者世聞切齒罵不絕口元亡不食而死寧志備考世聞管理鹽竈有德於寧後遂屏居硤石其妻李氏亦以知禮聞

郭彥澤

萬歷杭州府志河南人少有氣節高自稱許有葛先生者神於醫盡以其術授之避地武

林自稱洛

下遺民

貢師泰

傳詳名宦寧志備考師泰為戶部尚書轉運南北會海上多警遂留海寧寓湖塘村宋錢

家謝肅胡奎皆其友也所居里曰小桃源

丘克莊

始豐類稿廣陵人至正壬寅大比江浙行省克莊用流寓例以詩經就試預選年甫三十

識朗志果初在廣陵時天下承平一時貴游子弟日事娛樂克莊家故饒於貲獨從師友窮經史以問學為事及廣陵被兵一時謀人策士乘機遇合以取富貴顧乃入庠序訓生徒取所入以自給可謂士之卓然自立者

易貞

徐一夔澤存室記字廷翰本荊州人幼從父母避地來浙遂家焉貞天資粹美行甚謹飭選杭

學弟子員出入學校非特不為嬉戲徵逐之事亦未始見其笑至矧怒至詈居恒每有不怡之色人問之則曰貞之從親至浙也日漸長大冀有所成立以養父母今幸父猶強健而吾母竟棄不肖孤而去欲報無地焚焚在疚恒讀大戴記至母歿而柩棧不能飲口澤之氣存焉潛然出涕爰就母飲食起居之處顏之曰澤存

遼西阜

西湖游覽志元左丞相魯曾孫占籍錢塘工文翰仕行省都事後棄官居西湖年八十五

卒子宏洪武初選補杭州府學生年十八陳時政得失太祖悅之試秋柳賦稱旨吏部奏宏年少賜歸卒業尋以鄉貢歷教松江宏子端舉進士官刑部員外郎永樂中扈從北征死於戰

張昱

西江志字光弼廬陵人少從虞伯生得詩法楊完者鎮江浙用為參謀行樞密院判官張士誠

據吳以禮徵之不屈明太祖召至京師閱其老曰可閒矣厚賜遣還因自號可閒老人七修類稿張昱任浙省員外郎元末政壞遂棄官不仕居西湖以詩酒自娛號一笑居士嘗曰吾死埋骨西湖題曰詩人張員外墓足矣後果如其言海昌胡虛白作詩弔之云二仙坊裏張員外頭白相逢只論詩今日過門君不見小樓春雨燕歸遲西子湖頭碧草春天留山水葬詩人老逋泉下應相見為說梅花寫得真二仙坊在杭之壽安坊即今之花市也西湖游覽志昱罷官時居室已敝友人凌彥翀募緣以葺之疏云昌黎寄玉川子首稱洛城破屋之數間東坡題綠筠軒終比揚州纏腰之十萬一笑居士詩名優於張籍生計劣於陶潛囊無一錢之留家徒四壁之立若非慷慨而多助安得輪奐之

一新即欲取杜工部草堂貲何時可辦僅葺得楊
閣西槐市塾今歲無憂但不至於虛拘便可謂之
實惠此崢嶸事在特達心疏傳交游
皆助之其居始就當時傳為盛事

明

何得舉

嘉靖海寧縣志晉江人洪武初登進士第任
海寧令德惠及民任滿遂占籍海寧後改寧

府紀善致政還卜居於雙
仁巷終焉墓在西門外

鄧林

廣東通志字士齊新會人洪武丙子鄉薦授貴
縣教諭素嗜學工古文辭嘗謂學詩於陶韋學

文於史漢韓柳學書於晉唐諸名家考績至京大
學士楊士奇祭酒李時勉留史館修書尋出教南
昌被薦遷吏部主事宣德四年以事謫杭
州士人多從之游所著有退菴集傳於世

史鑑

獻徵錄字明古吳江人為人志正而直言確而屬於書無所不讀而尤熟於史好着古衣冠曳

履揮麈望之者以為神仙嘗與劉僉憲沈石田游寓武林所至為文寄之

薛侃

兩浙名賢錄字尚謙揭陽人操行醇固嘉靖間成進士官行人司司正素慕餘姚王陽明學遂

出其門精思力踐以勇銳見稱徙家於杭築天真精舍祠以祀陽明時與同志講學其中且為戒於後曰此講學公所後世王氏薛氏子孫世世無所預

張叔維

西州合譜虞山人畫宗董北苑吳仲圭游跡多在西湖自號西冷寓客故烟巒出沒善得

吳越諸山之神詩才清逸尤工七言絕句程孟陽數稱之為人孤介自守苟非意氣所合雖王公貴人黃金白璧浼焉去之以所作青山賣人即分散貧交或買舟沽酒挈伴湖山間不留一錢

宋登春

名山藏號海翁趙郡新河人其先世治農饒於貨登春少孤家中落嗜酒慕俠能挽強馳

騎通習詩畫囊書遠遊至吳會久寓錢塘以詩以酒以畫與一瓢道人兩相得晚依其兄子耕於天

鵞池之石田又自號鵞池生

祝時泰

錢塘縣志閩縣人博雅善詩嘉靖初中鄉舉官員外掛冠歸慕錢塘湖山之勝卜居西湖

與郡人沈仕輩結玉岑詩社

莫叔明

列朝詩集傳字公遠長洲人徙居武林好為詩苦思險詣務出人所不經道貧困益甚游

燕齊及楚反葬於武林自伐石為之表曰明詩人莫公遠之墓

錢可久

江南通志字思畏桐城人詩才俊逸字畫道潤自言與杭州西湖結物外交駕舟千里訪

之扣舷高歌旁若無人
一時推為風雅之冠

國朝

吳紹昌

舊浙江通志字有聲歙縣人寓錢塘性孝友與弟紹達相愛賦性嚴重有故人子來謁驕

不拜床下紹昌責之曰吾若父友也命之拜而後見之平生立然諾重朋友同里有負人百金迫除夕且死紹昌急以金授之曰金易耳耳自輕若是好行其義類如此

王猷定

舊浙江通志字于一別號軫石南昌人善古文為人倜儻自豪寓居西湖為文鬱勃如殷

雷未奮又如崩崖靡樹槎枒盤礴旁枝得隙突然干霄或間露卑率語然蒼骨老氣終不可沒

林嗣環

舊浙江通志號鐵崖福建晉江人登進士官粵東監司博學善屬文流寓西泠

汪之萼

舊浙江通志字含章歙人弱冠時母閔遭危疾之萼中夜肅衣冠告天願以身代刲臂肉

二寸許投藥鑄以進母霍然愈視羣從兄弟如同懷周其有無緩急尤以古人相勉勵不從則閉戶自責嘗語諸子曰以惠及人而期報是交為市也聞西泠山水名勝來錢塘結廬南屏之麓榜曰壑菴父母卒遂葬焉萼廬墓不復歸未幾亦卒葬於此

趙吉士

兩浙鹽法志字天羽號恒夫休寧人寄籍仁和中順治辛卯舉人知山西交城縣地僻而

山險羣盜盤踞其中吉士申明保甲團練之法奉檄進勦先日置酒張樂越宿復邀賓從剪燭賦詩夜半送客出郭即疾行四十里饗士卒於水泉灘進葫蘆川據三坐崖賊驚逸獲渠魁數十餘黨悉降又開高離山通水道溉田十萬餘頃治邑五載修學宮立義倉又罰贖令種柳於清源水間延

表四十里夾道垂陰民號趙公柳陞戶部郎權闕揚州釐革積弊商民感悅任滿監督京倉充會典

纂修官編輯鹽漕二書旋擢戶科給事中奉

命勘視河道凡地形水勢堤岸閘口條析無遺以註誤

降補國子監學正寓居宣武門西名其園曰寄園

以著述終老所著有奏疏序論書記十二卷交山

平寇四卷音韻正訛四卷詩詞共數十卷年七十

九卒子景從濟寧道景行丁卯舉人中書孫繼扞

已丑
進士

戴大受

錢塘縣志字與可號華琳休寧人寄籍錢塘博聞強記經史百家無不覽究而尤切於窮

理盡性之學自少至老每十年輒成一編其已刻

行世者曰世寶錄醒心錄蓄德錄皆集古嘉言懿

行條分而品節之多與人爲善之意年九十卒

嘉興府

漢

施延

海鹽文獻志字君子沛國蘄人少明五經旁通星官風角家貧常任作由拳半路亭食其力以

養母人不識也山陰馮敷爲吳郡督郵過亭延持帚往敷望而知其賢者下車謝之推食解衣與之錢不受順帝初嶽拜侍郎位至太尉

宋

錢顗

宋史本傳字安道無錫人初爲寧海軍節度推官當官而行無所容撓以金部員外郎爲殿中

侍御史裏行二年而貶自衛徙秀州家貧母老至勾貨親舊以給朝晡而怡然無謫官之色蘇軾遺

以詩有烏府先生鐵作肝
之句世因目爲鐵肝御史

李曾伯

宋史本傳字長孺潭懷人後居嘉興至元嘉禾志曾伯自登臚仕早以能稱持繡斧督餉

運兩分漕節七開大閭宦轍幾徧天下儒而知兵有雅量所至得將士心遠人聞風敬憚有可齋類

稿行世歷觀文殿學士

贈少保開府儀同三司

王昇

至元嘉禾志字逸老本京師人草聖奇偉徽宗宣和間被召入御書補右爵高宗南渡寓居崇

德之羔羊時上留神翰墨近臣有言其能者召對賜札以書玉音褒賞官至正使

朱敦儒

宋史本傳字希真河南人紹興二年賜進士出身爲祕書省正字至元嘉禾志敦儒天資

曠達以詞章擅名高宗南渡寓嘉禾嘗爲樵歌有讀書堂在天慶觀之西

朱楹

正德崇德志字濟之濟南人建炎登第授崇德令秩滿民不聽去楹亦安之買屋於市以定居

終左朝

請大夫

謹按至元嘉禾志楹作盈未詳孰是

張子修

弘治嘉興府志字德夫開封人建炎間以父蔭任石門市酒務稅因愛其地饒沃遂占籍

焉尋擢知施州秩滿陞副總管平生酷愛花木未及引年乞歸石門年八十乃終

趙善應

萬歷嘉興府志字彥遠漢王元佐之孫建炎間與其父申國避地崇德之洲錢遂家焉善

應性純孝嘗刺血和藥愈母疾母畏雷輒走護之寒夜歸恐擊門驚母露坐達旦官江西兵馬都監每四方水旱驚報輒不食同官燕會嘖嗟曰此豈為樂時耶尤哀稱為古君子

姜處恭

葉適姜處恭墓誌字安禮涇州長山人曾祖筠避亂於台州臨海祖仲田簽書南康軍討

李成墜馬卒父訖從政郎處恭來秀州嘉興始居之九歲而孤大母父母皆散死他州不能葬君營衣食治墳墓收拾諸櫬見星出入後得聚葬於武康上陌巖山既而頗買田治屋賙卹窮乏雖不以科目自達而懲渡江凋落之後奮寒士單薄之習積無至有以立家室教二子輝部皆成進士

時檄

正德崇德志字傳之其先彭城大族建炎三年主崇德簿因家焉父紹孫嘗知雷州兄宗道與

東坡同年進士相厚善坡詩有贈時同年者是也坡謫嶺表竭囊中以賁人高其義檄厯汀州通判知和州居官廉正惠愛移知峽州有識鑒長女既適于湖張孝祥欲以次女妻邑士莫元忠元忠尚居約以非偶辭檄笑曰莫子豈其不第耶遂妻之孫仲任皆特科補官

陸竣

構李詩繫字子高高郵人建炎初與兄埶徙崇德登紹熙元年進士歷祕書郎倅和州議散武

定軍諸州遂安攝濠州時寇猖獗竣開示大信以收人心散卒聞竣至受廛者數千乃悉簡為勁兵改知和州養士厲俗修倉浚湟免歸有益齋集兩浙名賢錄葬縣北六里漫塘劉宰誌其墓

顏復

舊浙江通志字太初復聖裔歷官禮部尚書建炎南渡家石門鎮北子孫自為村落號陋巷村

李正民

江南通志揚州人政和二年進士中詞學兼茂科構李詩繫字方叔官朝奉大夫徽猷閣

待制提舉洞霄宮紹興中寓海鹽善屬文邑中碑記多出其手子直養遂為海鹽人

張公秀

正德崇德志字仲實吳人從石林葉左丞遊風流清雅詞翰尤妙紹興初丞崇德遂居邑

郊扁其居曰漁叢

輔達

兩浙名賢錄趙州人寓居崇德乾道間為後軍統制孝宗欲處以邊郡問其能勝任否曰當以

家法治之又問何法曰子視軍民愛惜財賦遂除知泰州語察察曰吾目不識字手不能書但心能燭理耳能聽訟耳郡中果大治

蔡材

正德崇德志仙遊人倅平江貧不能歸借屋語溪因占籍焉子熙令孝感稱為廉平識者占其

後必昌熙卒於官子四閱開闢闡合詞以同居誓柩前皆以儒業授學者銖積無私橐及貴顯扁堂曰怡終身不變世以孝友推其門

趙汝愚

至元嘉禾志字子直鄱陽人孝宗乾道間魁多士寓崇德之洲錢官至丞相追封福王諡

忠定

王明清

至元嘉禾志字仲言汝陰人樵李詩繫明清甫十歲朱希真徐敦立過其父所詢以國史

中數事應之無遺由是受知慶元間居甥館於嘉禾官至朝散郎與其父雪溪兄仲信俱有史才當時諸公欲收置史館不果嘗剴切上封事是時南渡以來簡冊散亡老成凋謝明清哀集軼事遺聞

編為揮塵錄及玉照新志

焦炳炎

兩浙名賢錄字濟甫宣州人寓居嘉興舉進士第三理宗朝為諫官論奏累數百章時宰

主括田議遠近騷然炳炎痛疏其害面奏懇惻涕淚俱下上為動容然未有寢命炳炎論愈力時宰語人曰焦生非攻括田實攻我也炳炎聞之不為變必報寢而後已尋除太常少卿疏辭以右文殿修撰致仕

李鳴復

宋史本傳字成叔瀘州人嘉定二年進士萬曆秀水縣志寓居嘉興之東門理宗朝拜參

知政事後為福建安撫使
予祠子公夬公晉皆典郡

謹按萬曆秀水縣志誤作李
鳴字復山今據宋史改正

王用享

構李詩繫字子安自開封徙居崇德淳熙間
舉進士授丹陽尉嗜學手抄口誦至忘寢食

試宏博科分教襄陽以根柢之學表率士類
嘗作二記曰不貪不欺此其行已之實也

謹按正德崇德縣志
作王用亨未詳孰是

岳珂

構李詩繫字肅之彰德人飛李子霖之子嘉定
間守嘉興有惠政後家郡治西北金陀坊痛其

祖武穆為秦檜所陷作籲天辨誣錄等書總名曰
金陀粹編官至寶謨閣學士封鄴侯有玉楮集

董健

獻徵錄汴人仕至武功大夫扈從南渡家於海鹽之澉浦其後曰仲真者遷海寧之錢山澉浦

世隸軍籍其子源當往戌弟漢請代之遂復家澉浦

陳瑄

福建通志字子爽侯官人襄之曾孫至元嘉禾志瑄寓居崇德以清節稱官至資政殿大學士

謚清毅有讀通鑑隨筆藏於家至元間表其里曰清節

洪芹

兩浙名賢錄尚書僕射适之曾孫以祖蔭入官登進士第歷官將作少監屬詞臣無當上意慨

然思得天下士丞相程元鳳言當今地望無踰洪芹者進兼翰林直祕書少監權禮部侍郎中書舍人兵興詔書所至聞者奮激蓋芹所草也遷禮部侍郎帝銳意嚮用而以論去寓居嘉興怡然自適咸淳初起知寧國府

元

顧阿瑛

殷奎顧阿瑛墓志名德輝字仲瑛崑山人幼警敏善記誦以意氣自豪年三十始折節讀

書崇禮文儒喜購古書名畫彝鼎祕玩鑒賞無虛日築園於舊宅西偏名曰玉山佳處日與客酌酒賦詩為樂阿瑛才膽思捷語笑之頃篇章即就恒屈服其坐人又萃友人名作如張翥李孝光楊維禎張伯雨而下刻梓者數十家總題曰草堂雅集舉茂才署會稽教諭力辭不赴母葬廬墓大閱釋氏書乃謝絕塵事僑居嘉興合溪漁釣五湖三泖間自稱金粟道人以子思封武畧將軍水軍正千戶飛騎尉錢塘縣男

陸德方

海鹽縣圖經字顯叔華亭人至正十年登賢書授般陽路學正未幾掛冠歸時平章河南

沈照避亂海鹽甘泉鄉德方單貧徒步傭書於其
家俄與談經史論時政沈大驚詢知所自遂以女
妻之今梅園陸
氏皆其後人也

吳森

嘉興府志字君茂汝南人徙居嘉興魏塘鎮為
管軍千戶饒於貲好施與嘗捐田二頃建塾延
師以教鄉里廉訪使
奏森義行表其門閭

明

牛諒

構李詩繫字士良山東東平州人元末寓居嘉
興與鮑恂張翼諸人友善學者多從之遊自顏

其堂曰尚友明初應詔除翰林院典籍同學士張
以寧使安南御製歌詩賜之厯陞禮部尚書著述
多甚

高丘

萬歷嘉興府志字彥高本畏吾氏高昌裔大父仕元為江南行臺御史中丞岳博洽有才華儀

容秀整人望而敬之工書兼通丹藥卜筮之術洪武間薦知雲南免官寓居嘉禾又嘗寓魏塘

高巽志

明詩綜傳字士敏蕭縣人構李詩繫元末僑居木郡嘗受業於宣城貢師秦鄴陽周伯琦

遂昌鄭元祐為文深醇典雅成一家言以薦為鄮山書院山長明洪武二年徵修元史入翰林累遷

侍講學士未幾引退又召為試吏部侍郎以事去官謫居胸山建文間召為太常少卿壬午靖難兵

渡江巽志遷去入永嘉鴈宕山其門人文淵閣侍書蔣競亦潛踪於此巽志病卒競為經紀其喪葬

芙蓉峯北所著有嗇菴集

孟觀

舊浙江通志亞聖五十四代孫祖忠厚扈宋南渡封信安郡王賜第姑蘇子孫遂為吳人明初

觀應人才詔授永寧知縣有治行陞吳府審理副避兵寓於嘉興之清風涇

桑慎

兩浙名賢錄字仲修世居常州遷嘉興性孝友苦行力學洪武初為監察御史見事廷諍朋友

有過輒面折之以行部海南奏誅衛使張榮坐不避八議罪謫瓊州安置已而召還

施懋

萬歷嘉興府志字以德應天人能詩文工書有法授孝豐知縣致仕官無餘貲挈妻子寓秀之

醋坊橋嘗從侍御戴簡菴學乃與其子經為忘年交往來益密遂相依而居

康大和

福建通志字原中莆田人嘉靖乙未進士萬歷秀水縣志大和早負才名官翰林三十年

歷南京少宗伯及大司空致政歸避倭僑寓禾郡與吳太宰諸公遊有禾城集

邱上儀

舊浙江通志字惟正武進人武進士受知川湖總督朱變元由江西都司歷海鹽參將有

惠政陞任不赴隱居邵灣紫雲山中賣漿為生
親知贈遺絲粟不受年七十餘子孫家於鹽

汪珂玉

明詩綜傳字玉水徽州人僑居嘉興崇禎中
官山東鹽運使判官留心著述輯珊瑚網一

編

劉儼

海鹽縣圖經字敬先真定人父貞官於鹽遂占
籍居澈川博學善詩文有古行娶瞽妻終身愛

敬如賓門人蕭孚貧卻其贄且周之粟
友之死無所歸推田三畝鬻以葬之

吳懷賢

嘉興府志休寧人僑居嘉興以中書舍人辦
事詰勅房中丞楊漣劾魏忠賢二十四大罪

懷賢擊節稱嘆加以評注工部員外吳昌期奉差
督理惠王府第糾劾侈冒忤璫撤回懷賢遺書稱
之有事極必返之語詞多激烈其僕得罪於懷賢
遂竊其所評註楊疏及遺昌期札密首厥衛忠賢

令校尉百餘縛懷賢及其妾邱氏子道昇送鎮撫司懷賢斃杖下崇禎初子道昇上書訟冤贈工部主事

夏允彝

嘉禾徵獻錄字彞仲號環公華亭人寄籍嘉善萬歷戊午以儒士入試遂中式丁丑成進士授長樂知縣多異政擢吏部考功主事未赴遭國變自沉於河而死彞仲神韻秀爽雖弱不勝衣而意慮深長有表正人倫氣象不獨以文章自見也所著有禹貢合注

湖州府

漢

吳羌

西吳里語避王莽之亂隨梅福入吳攜妻子徙於烏程之餘不鄉以溪山紆鬱因避處焉時稱

高士後人名其所居曰吳羌山

錢林

兩浙名賢錄字元茂徐州人建平中為諫議大夫後王莽專政遂棄官隱於平望鄉陂門里梓

山之東子孫遂家焉西吳里語長興有錢林故宅在子山吉祥鄉園林幽趣花石佳致層閣在山高

門臨水

邱俊

吳興掌故漢平帝時持節按撫江南屬王莽專政因留居烏程後其子邱騰隨光武起義南陽

累仕至大司馬卒葬於烏程

晉

庾翼

吳興掌故汲郡人仕晉為蘭陵令奮節將軍隨元帝過江為吳興郡丞因居烏程翼生豫章太

守鎮鎮生征南司馬建武將軍欽信欽信生宋晉熙王兵曹參軍黯黯生南臺御史高生齊驃騎

大將軍孟真孟真生梁散騎侍郎僧

朗僧朗生陳給事中五兵尚書宗

陳達

冊府元龜漢太邱長實之後世居潁川達為長城令悅其山水遂家焉曰此地山川秀麗後當

有異人出我子

孫必鍾斯運

南北朝

裴子野

萬曆湖州府志河東人少好學善屬文仕齊為江夏王行參軍遭父憂去職後為諸暨令

以曾祖松之嘗令故鄣遂留居焉撰

宋畧二十卷吳興掌故子野字幾原

唐

陸龜蒙

唐書本傳字魯望舉進士不中往從湖州刺史張搏游搏厯湖蘇二州辟以自佐龜蒙多

所論撰雖幽隱疾痛貲無十日計不少輟也嗜茶置園顧渚山下歲取租茶自判品第不喜與流俗交雖造門不肯見設蓬席齋束書茶竈筆床釣具往來時謂江湖散人或號天隨予以高士召不至西吳里語龜蒙吳江人著吳興實錄若干卷今長興有別業在

陸羽

唐書本傳字鴻漸一名疾字季疵復州竟陵人不知所生或言有僧得諸水濱畜之既長以易

自筮得蹇之漸曰鴻漸於陸其羽可用為儀乃以陸為氏名而字之上元初隱苕溪自稱桑苧翁闔門著書或獨行野中誦詩擊木徘徊不得意時謂今接輿也貞元末卒羽嗜茶著經三篇言茶之原之法之具尤備鬻茶者至陶羽形置煬突間祀為茶神

崔元亮

吳興掌故磁州昭義人元和中為吳興刺史因家於長興縣西之崔灣

顧雲

全唐詩錄傳字垂象池州人風韻詳整與杜荀鶴殷文珪友善同肄業九華咸通中登第為高

駢淮南從事師鐸之亂退居霅川杜門著書執政薦修國史書成加虞部員外郎

五代

鍾廷翰

十國春秋不知何許人流寓湖州素有賢名武肅王命攝安吉主簿牒曰廷翰儒素修身

早升官緒寓居霅水累厯星霜克循廉謹之規備顯溫恭之道今者願求錄用特議掄材安吉屬城印曹闕吏俾期差攝勉効公方倘聞佐理之能豈恤超遷之獎後不知所終

宋

葉夢得

宋史本傳字少蘊蘇州吳縣人嗜學多識紹聖四年進士自婺州教授召對累遷翰林學

士極論士大夫朋黨之弊蔡京欲以童貫宣撫陝西取青唐夢得曰祖宗時宣撫皆是見任執政未有以中人為之五年帥穎昌發常平粟振民常平使者括錢五十萬糴粳米輸後苑夢得上疏極論高宗駐蹕揚州陳待敵之計遷尚書左丞與宰相朱勝非論不協除資政殿學士不拜歸湖州紹興初起知建康府時建康荒殘夢得移統制官分守要害奏防江八事金帥入寇夢得團結民兵數萬分據江津金兵不得渡而去時諸道兵咸集夢得總四路漕計軍用不乏故諸將得悉力以戰移知福州海寇猖獗或招或捕平寇五十餘尋致仕卒湖州贈檢校少保徐一夔杓軒記葉賁字本蕃世居吳門政和間石林先生夢得始卜葬其先府君於吳興之弁山其地居風氣之會奇石如林有瑰

奇絕特之狀因號石林且營別業至黃
因取其先世所植之樹名軒以志之

方淑

西吳里語字智善汴人年十九登進士紹興初
為德清縣丞愛溪山之勝因家焉累遷翰林學

士時秦檜當國訪以時事淑直言無諱大忤檜意
因罷歸平居常與王洋劉一止徜徉慈相寺中倡

酬往返以
文墨相娛

任仲

歸安縣志河南人紹興初以明經進士為仙居
令有治績內遷至禮部侍郎後隨駕南渡遂居

歸安是為吳興任氏時無俸

米頒賜田於本邑南靈山

何彥猷

兩浙名賢錄字淑遠高唐人紹興中為大理
丞時秦檜誣岳飛下獄彥猷與李若璞論其

無罪万俟卨劾彥猷等黨奸撓法罪在不赦罷黜
寓居德清餘不溪上孝宗即位追贈二階特命其

子伯寧為
徽州文學

蔡洸

萬厯湖州府志仙遊人端明殿學士襄之後徙居雪川以父蔭補將仕郎中科除大理評事遷

寺丞出知鎮江府會西溪卒移屯建康舳舻相衝時久旱郡民築陂陂水灌漑漕司檄郡決之父老泣訴洸曰吾不忍獲罪百姓也卒不決已而大雨漕通歲亦大熟除司農少卿請輸絹折納公私皆便以襄未易名力請於朝賜謚忠惠兩浙名賢錄洸字子平

李道傳

宋史本傳字貫之隆州井研人四川通志徙居吳興讀河南程氏遺書玩索至忘寢食慶

元元年登進士第累官著作郎提舉常平茶鹽公事居官以踐履為本為學以踐履為功雖處暗室整襟危坐肅如也卒謚文靖

蕭德藻

福建通志字東夫閩清人紹興進士嘗令烏程後遂家焉所居屏山千巖競秀自號千巖

老人楊萬里稱云近世詩人若范石湖之清新尤梁溪之平淡陸放翁之數腴蕭千巖之工緻皆余

所畏也著有

千巖擇稿

劉光祖

宋史本傳字德修簡州陽安人登進士第吳興掌故紹興間為殿中侍御史極論朋黨偽

學之禁言甚剴切寧宗初坐留朱熹罷起居郎管玉虛觀慶元三年言官論列放棄房州後復職歷

官顯謨閣學士以蜀地險遠寓居

德清之新市市人呼其家曰川劉

游似

四川通志安漢人仲鴻子德清縣志字景仁由進士恩官知樞密院事淳祐五年入相上問唐

太宗貞觀治效之速對以人主一念之烈足以旋乾轉坤及親儒從諫敬畏檢身諸奏上嘉納之累

章乞歸御書事君以忠視民如傷行已有耻避世無悶十六字以賜且慰留之歷階廣平郡公右丞相兼樞密使七年致仕初喜吳興山水嘗寓

居德清新市鎮至是遂占籍焉卒謚清獻

吳柔勝

江南通志寧國人因母家徙溧水故又為溧水人德清縣志字勝之幼聽其父講伊洛書

已知有持敬之學人憚其方嚴淳熙八年登進士歷官至祕書閣修撰寓居德清之新市鎮後家焉

二子淵潛皆宋末名臣

姜夔

西江志字堯章德興人學詩於蕭千巖琢句精工楊誠齋謂其嗣伯子曰吾與汝弗如也夔自

號白石道人紹興間泰檜當國隱居箬坑之丁山參政張燾累薦不起高宗賜宸翰建御書閣貯之以隱逸終吳興掌故夔少從父宦古沔千巖老人在沔與夔相得遂攜過苕霅以兄之女妻之遂家

武康

張嶠

武康縣志字巨山襄陽人上舍登第居邑之上陌里宋高宗雅知其文辭擢中書舍人官至敷

文閣待制有紫薇集子
昌詩官至朝議大夫

程公許

宋史本傳字季與敘州宣化人嘉定四年進士權禮部侍郎鄭清之以少保奉祠侍講幄

中批復其子士昌官職與內祠且許侍養行在公許繳奏士昌罪重內祠侍養之命宜與收寢遷中書舍人進禮部侍郎公許自繳士昌之命清之日夜於經筵短公許清之再相公許屏居湖州者四年帝欲召為文字官清之奏已令守婺帝曰朕欲其來乃授權刑部尚書尋授寶章閣學士而公許已卒

牟子才

吳興掌故字存叟井研人愛吳興山水因家焉自幼從學於魏鶴山嘉定間除史館檢校

官對延英殿陳六事受知理宗嘗曰牟子才好箇士大夫官至資政殿學士卒謚清惠所著存齋稿一百卷內外制十卷四朝史稿五卷奏議二十卷經筵講議五卷口義一卷故事三卷四書易編三十卷春秋輪輻稿未就卒

王岵

文獻通考字季彛北海人紹淳間名士寓居吳興陸務觀與之厚善三子甲田申皆登科

韓元吉

西吳里語字旡咎官至尚書常寓德清縣之慈相寺登覽之餘每多吟作東萊呂成公其

壻也嘗來訪之相與講讀於寺西之竹林精舍故寺中有東萊書院嘉熙間縣令章鑑勅屋扁曰東萊讀

書堂

文及翁

兩浙名賢錄字時學綿州人徙居吳興歷官資政殿學士景定間言公田事有名朝野宋

亡元世祖累徵不起閉門著書有文集二十卷

李龍

佩楚軒客談吳郡笠澤人僑居烏程三滙效元白歌詩不樂仕進年登耄期自作墓銘趙文曜

葬之何道兩山間樹梅百株趙得符題碣曰宋詩人雪林李君之墓

元

敖繼翁

兩浙名賢錄字君善福州人寓居烏程築一小樓冬不爐夏不扇惟事經史湖之名士從

之遊者甚衆浙西平章事高彥敬

薦授信州教授有文集二十卷

王簡

兩浙名賢錄字伯敬霅化縣人父吉昌任濟南府治中元統間簡以薦授祁陽縣尹改烏程因

家焉後遷知福寧州至正十二年劇賊王善寇建邵迫州境簡率民力戰馬中流矢被執罵賊死屍不仆頸無血惟涌白沫如流膏次子相亦遇害妻潘氏聞變恐被辱先自縊家奴逃還告其長子楨楨往得父母屍歸葬烏程江浙行省上其事贈奉議大夫濟南路總管上輕車都尉太原郡侯以楨襲父爵除紹興路總管張士誠陷城亦以不屈死

張羽

西江志字來儀潯陽人吳興掌故元季領鄉薦授安定書院山長卜居吳興遂家烏程之戴山

東洪武中召見仕至太常寺丞兼署翰林院同掌文淵閣事羽詩文奇古與姑蘇高啟楊基徐賁齊名所著有

靜居集

謹按湖州府志因羽為潯陽人遂訛以為南潯人今改入寓賢

陸厚

江南通志華亭人居城東自號東園散人博學經史尤精孫吳書兵亂往來天目蒼雲間將某

聞其名覓之不可得兵息返故廬勸之仕不應有詩集號古漁唱

郭學乾

始豐類稿廬陵人負奇氣精地理學好遊覽名山山川至正中縱觀五湖之勝至吳興而止

會兵亂道梗欲歸不能僑居郡之連水上連上之人慕與之遊爭館之久之卒同郡羅孔碩李訥葬之道場山之阿尋陽張羽為撰行述以揭諸墓

陳振

吳興掌故字文舉杞縣人宋南渡居錢塘振讀書實踐年二十以詩經舉為蘇州文學掾元末

避兵弁山家焉子引為古田教諭引子敏政成進士官至南康知府

明

溫祥卿

兩浙名賢錄大同人精通陰陽術數之學元末避兵家於長興耿炳文初下湖州民心未

附祥卿杖策以布衣進謁炳文與語奇之遂留贊軍事為炳文畫策據要害設戰具為守禦計未幾

吳平以畫贊功累官兵部尚書

徐賁

萬厯湖州府志字幼文蜀人工詩在吳與高啟諸人齊名尤善寫山水張士誠據蘇辟為從事

固辭不就徙居烏程之蜀山洪武中以薦至京授給事擢河南左布政所著有北郭集

孫一元

陝西通志字太初平涼人列朝詩集傳太初嘗棲太白山之巔故稱太白山人風儀秀朗

玄巾白袷以鐵笛鶴瓢自隨善飲酒好談論所至傾動其士大夫嘗南入吳會遂棲遲不去費宏罷相訪之南屏山中值其晝寢就卧內與語送之及門了不酬謝費出語人曰吾一生未嘗見此人也

名山藏太初晚居湖州與尚書劉麟孝廉施侃山人吳琬侍御陸崑結社號苕溪五隱年五十餘卒葬道場山中國寶新編太初性好詩初談導引人疑其仙晚娶婚娶入湖南社援引儒術皆非其本色也

劉麟

傳詳名宦西江志麟為紹興知府罷士民為建小劉祠以配漢劉寵寓湖州晚好樓居力不能構懸籃輿於梁曲卧其中名曰神樓文徵明繪圖遺之

袁衷

兩浙名賢錄字永之長洲人五齡知書七歲賦詩有奇語嘉靖乙酉應天鄉試第一舉進士授武選主事觸忤時貴編戍湖州寓居城南之峴山寺搜奇弔古悠然自適後人以其所寓處稱為胥臺讀書樓胥臺其號也

唐志大

兩浙名賢錄字子迪上海人嘉靖辛丑進士授南京行人司副便道歸將迎母以行比歸

而母病遂乞終養敦行色養之道躬親稼穡以給甘旨閒居樂志自謂三公不易無復有用世意倭從海上起聞吳興地僻遂奉母與羣從弟妹子壻居焉同郡徐伯臣董子元亦俱至相與結社賦詩有開元之遺音所著有僑居賦及詩文若干卷又輯高廟聖政記二十四卷藏於家

韓奕

江南通志字公望長洲人博學工詩常浪跡山水間遇山僧野客累月忘返所契王賓素為太

守姚善所重善欲因賓致奕奕終不往一日與賓詣奕奕走楞伽山善隨至又泛小舟由太湖入苕霅溪避之善嘆曰韓先生所謂名可得聞身不可得而見也

徐獻忠

萬厯湖州府志字伯臣華亭人孝友天至博學能文中應天鄉試為奉化令有聲其父病

執獻忠手曰吾家三世不益丁得無繫於葬所哉於是偕堪輿家卜地得烏程之福山葬其父遂家焉

洪儒

歸安縣志字澹寧歙縣人父海容教授西吳因家焉儒天性孝友言坊行表足為後學儀型學

使者屢舉優行表其廬曰世濟名賢

黃周星

明詩綜傳字九烟上元人崇禎進士除戶部主事晚居湖州號圖菴布衣素冠寒暑不易

嘗賦詩云高山流水詩千軸明月清風酒一船借問阿誰堪作伴美人才子與神仙年七十自撰墓誌作解脫吟與妻孥訣自沉於水

國朝

王武臣

德清縣志字莞菴武昌人由武科歷任遊擊寓居邑之文昌里蕭然齋閣圖書數卷而已

所著有四山園稿吳越吟種德錄諸刻

寧波府

宋

祖域

嘉靖寧波府志字貞夫建隆中由閩徙奉化仕至殿前司統制平居尚氣節樂施予歲饑發私

廩以賑所活以千計里子弟不能學者為招師儒使就學貧不能婚喪者出財助之既歿民懷其惠

立廟以祀

方軫

福建通志字叔時莆田人以父任太廟齋郎大觀元年蔡京復相軫疏列其過千二百餘言京

怒流軫嶺南靖康元年軫詣闕陳訴始得收復後知鄞縣天啟慈谿縣志軫貧不能歸遂家於慈谿

之鳴
鶴山

黃子游

傳詳名宦成化四明郡志浦城人徙奉化

卞大亨

寶慶四明志字嘉甫泰州人由鄉舉入太學升舍有聲靖康中攜二子走行在丞相范宗

尹以遺逸薦特恩調懷寧縣簿紹興中隱居象山之錢塘村手植萬松行吟其間自號松隱居士好讀左氏傳及遷固諸史老杜詩素習養生導引術醫藥占算尤極其妙解衣推食賑卹飢寒手製藥餌惠利甚溥子園字子車亦有聲太學號卞夫子登紹興三十年第授揚州倅

王撝

成化四明郡志其先開封人建炎渡江居於鄞幼學於里師樓昉為文醇深善議論壯歲試詞

科不中輒棄去後登嘉定進士第同年余天鈞參知政事屬教其子弟歲終致束修以謝堅不肯受曰吾二兒習詞學鄉里無完書願從公求尺牘天鈞欣然許之後二子應麟應鳳果中詞學科擢嘗預修四朝史為輿服志六卷後直祕閣知温州

徐立之

寶慶四明志字植夫登州人紹聖初登進士甲科靖康後扈駕南幸丞相呂頤浩最知遇之及秦檜當國丐祠居鄞徜徉里閭三十年積官至朝散大夫年逾八秩手不釋卷累贈開府儀同

三司

張邵

成化四明郡志字才彥和州烏江人宣和三年登上舍第建炎初假禮部尚書使金其弟為明州觀察推官奉母居鄞卒葬鄞之雷峯因家焉邵使還除敷文待制紹興二十五年知池州請祠邵

遇事慷慨憤激常以功名自許冒險出使人皆危
之及被囚拘畧無悔懼賦詩作文動盈編帙歸獻
所聞納忠於朝高宗將進
用之而邵無意於仕進矣

蔣猷

汪藻蔣猷墓志字仲遠金壇人元豐八年進士
官徽猷閣直學士提舉嵩山崇福宮建炎三年

避地明州卒於昌國縣蓬萊鄉天資渾厚平生未
嘗以游辭偽色借人其論事上前不為苟合雖人
主盛怒反覆開陳必盡理而後已其論薦皆一時
名士平居無嗜好未嘗一日廢書有文集二十卷
藏於
家

高友文

成化四明郡志字仲章號寓齋其先汴人建
炎間隨駕南渡遂家於鄞性端謹學問該博

舉進士調泰州如臯尉初志欲仕以養親親歿築
室墓旁絕口不談名利事客有誚友文者曰子方

筮仕正宜樹立以圖顯大何乃獨為沉默友文數
曰仕以求祿祿以養親親亡矣何以仕為屢薦不
起

郭維

嘉靖寧波府志河南人父貫官奉議郎終於長
河判官建炎間維徙居四明以北學教授諸生

從者如雲卒
葬西湖之原

顧主簿

容齋三筆不知何許人南渡後寓慈谿安於
貧賤不斲人之知至於踐履雖細事不苟平

且起俟賣菜者過門問菜把值幾何隨所言酬之
他飲食布帛亦然久之人皆信服不忍欺苟一日
之用足則玩心墳典不事交游里中有不安其
分武斷強忤者相與譏之曰汝豈顧主簿耶

朱翌

延祐四明志字仲新舒州蘄川人漢桐鄉耆夫
邑之後以太學生賜第初為溧水簿高宗南渡

為祕書監屬預修徽宗實錄時范冲領史局翌剛
潤功居多秦檜逐趙鼎翌以鼎黨貶韶州後召還
朝廷憫其飢寒計貶所四十年衣俸悉予之遂卜
居鄞嘗作信天緣堂記死自為誌周必大論其詩
似杜牧之而出處亦相類號
省事老人文集四十四卷

李宗質

樓鑰李宗質墓誌字文叔世家於濮八歲而
孤所生母展氏去紹興八年補將仕郎至江

州水南遇展氏於屢中抱持相哭別十年而得奉
色養者二十年赴調監明州大嵩鹽場因卜居石
塘遂為明之鄞人十七年陞遂昌令歲饑寇作於
旁郡亟捕首惡斃之羣黨帖息隆興元年改知會
稽丁展氏憂服除權通判隆興府時江西大旱宗
質賑濟盡力全活者衆改通判鎮江府外臺以清
廉公勤引薦於朝差知台州彌事奮勵聽訟必先
抑告訐懲奸惡理財精察量入為出帑庾為之充

行增學田以養士者數百畝及調戍兵遣海州號令簡明凜有風采縣吏重足承命而未嘗輕用鞭撻聞者服其平允尋差主管武夷山沖佑觀五轉至朝散郎淳熙十一年卒年七十三

黃龜年

延祐四明志字德紹其先福州人後葬父於鄞因家焉舉進士第為殿中侍御史與諫官劉秉論秦檜行類莽卓特朝廷未之察檜由是罷相至檜再相龜年寓湖州檜撫其過押使回福州

檜死龜年

復居於鄞

鄭鏐

成化四明郡志字剛中由福州徙鄞躬孝友之行貫通經史以詞賦名於時登紹興三十年進

士仕至屯田郎寧宗在英邸兼小學教授嘗進勸戒元龜後特加贈且官其子

張良臣

成化四明郡志字武子一字漢卿家洪州避寇來明州因占籍焉善詩清刻高潔不蹈凡

近尤長於唐人絕句語盡而
意益遠後宋詩人咸推服之

趙粹中

成化四明郡志字叔達自密州徙居於鄞登
紹興進士孝宗銳意復北疆粹中進恢復機

密十論富強要策十卷孝宗亟喜之一歲九遷由
祕書郎權起居郎給事中除吏部侍郎嘗上疏罷
王安石父子從祀乞雪岳飛冤狀又集司馬光范
續董斧等奏議正太祖東嚮之位議不行寧宗即
位卒如其議後以待制知池州家居十年粹中善
筆札子遵書似其父遵幼孤終身不肯仕嘗隱茅
山郡守屢薦於朝特
許循資遵亦謝不受

魏杞

成化四明郡志字南夫由焦山徙於鄞登紹興
十二年進士第歷縣有能名後遷宗正少卿假

禮部尚書使金行次盱眙金人以萬騎脅之杞不
為動奉禮幣以往至金卒正敵國禮減歲幣舊數

以歸孝宗大喜除起居郎遷給事中乾道三年拜同知樞密參知政事明年拜右僕射除觀文殿學士卒諡文節杞能詩居小溪絕不言時政所著有山房集三蘇言行編

韓元禮

嘉靖寧波府志字敬仲鄞人淳熙九年進士光宗時授中書舍人以言事忤旨謫象山令

開禧二年改松溪黨籍禍起以有惠於象遂泛海至其邑西南鄉居焉

元

任士林

嘉靖寧波府志字叔實其先蜀綿竹人徙居奉化再世又徙埼山幼穎敏六歲能屬文既

長喪父廬墓讀書疊疊不倦為文沉厚正大一以理為主而含蓄頓挫讀之有餘味後講道會稽授徒錢塘遠近求請無虛日至大初以薦授安定書院山長所著有中易論語指要及松鄉文集若干

卷

謝暉

嘉靖寧波府志字彥實資陽人徙鄞識見通敏聞武康石塘胡長孺以德學淑後進往受業其

門或勸習舉子業答曰學以博通古今資文行耳仕奚所急哉趙文敏授以書法比家居藩帥郡守詣門請交一無所求為詩文簡淡雋永人以其尺牘片楮為榮暉亦不自秘惜求輒應之有所不可雖貴勢不能動也

揭沄

天啟慈谿縣志字伯防荆楚人後斯子少淳樸苦學年十八盡通六經大義工古文辭補太學

生端方有威儀六館士敬憚之以蔭補祕書郎遷國史編修歷官至肅政廉訪使守建寧偽漢陳友諒兵寇松關建寧受圍吏民相繼出奔沄與經畧使巴延布哈協謀禦賊設方畧復延平等三州改

江西行省未赴以工部郎中召時
淮浙道不通遂留家四明之慈溪

丁鶴年

戴良高士傳西域人父職馬祿丁臨川縣簿
以治行高等陞武昌縣達魯噶齊有惠政解

官之日愛其土遂家焉子五人鶴年最幼父死鶴
年甫十二俗素短喪鶴年以為非古制乃服斬衰
三年厲志為學年十七通詩書禮三經淮兵渡江
襲武昌鶴年奉母以行間從兄吉雅摩迪音避地越
江上徒步往依焉遂留四明或旅食海鄉為童子
師或寓居僧舍賣藥自給雖久處艱瘁泊如也慈
溪縣尹陳林稱賢令四方士大夫多依之鶴年居
是邑數載未嘗睹其面嘗自謂曰凡為清士當以
廉為主義為輔和為衛三
者備庶可免於今之世矣

廼賢

元詩選傳字易之世居金山之西元興西北諸
部多散處內地故易之稱南陽人隨其兄宦遊

江浙卜居於鄞再至京師以能文名尤長歌詩每一篇出士大夫輒傳誦之時浙人韓與王能書王子充善古文易之與二人偕來人目為江東三絕久之歸浙東辟為東湖書院山長以薦授翰林院編修官出參布達實哩軍事所著有金臺集

吳志淳

成化四明郡志字主一以字行濟南人工詩善草隸以父蔭歷官靖安都昌二縣簿元季

棄官寓鄞之東湖至正末執政奏除待制翰林命下為權倖所匿志淳已在耄耄若不聞焉當時若南昌揭伯防會稽盛景華魏郡邊魯生永嘉柴養吾亦嘗寄跡於鄞至如龍子高之寓慈溪戴叔能之寓定海數君子者或賦詩或作文或論書法各逞所長故詞章翰墨人得之不啻拱壁養吾師米南宮寫雲山烟嵐變滅渾然天成魯生亦善寫水墨花鳥梅石而竹精於鈎勒顫掣之勢則有得於

李後主子高後歸於閩張淮中作琴劍歌送之
明詩綜傳志淳所著有環碧軒柳南漁隱二集

謝昌元

兩浙名賢錄字叔敬西蜀資州人類試四川
第一調肇慶府教授除太學博士知封州後

為沿海參議官因家於鄞開慶初長子大椿挈其
家屬來鄞舟由鄂州世祖駐兵江潯獲其舟以大
椿歸甚愛之俾給事殿中命大椿召昌元入朝上
深器之呼為南儒預議中書省事為禮部尚書

周友常

鎮海縣志字景賢其先青州人舉至正乙酉
進士授餘姚州學正設科課士井井有條與

朱公遷並馳名江左宋文瓚薦其才陞慶元路提
舉安民弭盜綽有成績未幾因方國珍擾內地陳
救援三策弗用掛冠隱定海大浹江之南
築室棲遲混跡漁樵子孫世為定海人

明

李善

成化四明郡志字原善東平人父灝仕元為三

江巡檢遂家慈谿篤志問學處窮約簞瓢自樂

喜怒不形於色人莫得窺其涯涘嘗額所居之室

曰人性皆善日吟哦其中人羨其所作豪放目之

曰小李白壽七十

六所著有崇陽稿

賀確

陳鎬賀確傳字存誠隴西人洪武初徙家四明

少事舉業試有司一不利即棄去遂肆力於古

自六經子史以至天文地理醫卜之書無不覽究

為文詞下筆輒有古風以菊有隱者操篤愛之別

號菊隱學士周敘以其有史才薦修遼金元三史

力辭不就司延為鄉飲大賓幅巾深衣儀度整

肅望而知為君子暇則縱尋山水間優

游以老年九十三所著友菊詩集一卷

陳遠

嘉靖寧波府志字中復一字中孚先濮之鄆城

人弱冠遊學宣饒間從中書左丞韓伯高授易

得專門奧旨工書法有晉人風度尤善模寫人物
過四明愛俗尚淳厚遂家焉洪武中召至闕廷命
寫御容賜金帛以文淵閣待詔歸里永樂間遣中
貴馳驛召入覲賜賚益厚憫其年老賜歸遠為人
清峻剛直毅然不可犯而意度閒雅接
之則和氣藹如故士大夫多敬慕焉

劉端

象山縣志泗州人景泰七年由選貢丞象山以
節愛稱令缺署篆久民甚德之雅善堪輿曰象

山仁里也遂卜居城北入籍焉子景弘
治間領鄉薦歷吳縣令陞岳州通判

羅心樸

奉化縣志字夢章號抱靈四川營山人崇禎
丁丑進士仕寧波司李風裁凜然豪猾斂跡

明季辭組蜀道阻絕游奉化之小
萬竹愛其山水清曠築室居焉

浙江通志卷一百九十四